

1607 numaralı defterin 1. sayfa 1. sırasında kayıtlı " Bâbu's-Sa'âde Ağası Gazanfer Ağa bin Abdurrahman Vakfi"na ait 1004 H. / 1596 M. tarihli vakfiyenin yeni harflere çevirisidir

B'ismillâhi'r-Rahmâni'r-Rahîm

İbtidâ-i kelâm-ı vâkıf-ı hâl mişevd zikr-i Bâri-i müte'âl Nesir: Her matla'-i sühân seher aferîn ki neyyir-i a'zam-ı ism-i Rabbi'l âlemîn mânend-i subh-ı nehıstın revnâk-ı safâ-yı sıdk u yakîn bulmaz ve şol ser levhâ-i defter-i ferhunde-i eser ki şükr ü nimeti sultân-ı kazâ u kader birle zîb u fer bulmaya misal vakf-ı bi-tescîl mevkif-i i'tibâr ve kâbulde cilveger olmaz Nazım: Lîk senayiş zibân berterest herçi zebân gûyed ez-ân berterest nutk-u şitayişiçi temennâst îyn akl u temennaşçi sudest iyn Nesir: Pes ol cenâb-ı râbbü'l erbâb mâlikü'l rikâb sultân-ı melîk-i câvidan vâkıf-ı esrâr-ı ins ü can sâni' u Hayy u Kayyum nûr-bahş-ı masâbih-i nücûm râfi'-i kubbe-i câmi'-i eflâk bâsît-u bisat-ı mâbed-i hakk çerâğ-efzûn-u medrese-i âlem-i hikmet âmûz *"alleme'l-insâne mâ lem ya'lem"* Nazım: an ki bi levh u kalem kerd rakam ber ser-levh-i adem harf-i kalem nâzır-ı âmâl-i ibâd hasîb-i ruz-i tenâd hadî-i sebil-i din-i kavîm mübdi'-i sel-sebil-i bağ-ı nâim celle celâluhu ve amme ale'l-âlemîn birrahu ve nevalehu hazretlerinin cenâb-ı büzürgvârına sâd bâr ve sâd hezâr tazarrû'u niyâz ve acz u kusûr bi enbâz ile mehâmid bi-müntehâ ve müntehâ-yı bi-intihâ isdâr ve i'şâr olunur ki debistân-ı dilistânı âlem-i üslûb-ı bedî üzere ve sun-u acîb ve vaz-ı dil-firîb üzere ihtirâ edüp sakf-ı zerrînin zînet-i fâhva-yı *"ve lekâd zeyyenne's-semâe"* ile tezyîn ve sath-ı anberinin nakş-ı münbit-i gül ve reyyâhîn ile reşk-i nigaristân-ı çîn edüp nüshâ-i insânı ahsen-i takvîmde imlâ ve eymen-i üslûbda inşâ buyurub *"ve alleme âdeme el esmâe kulleha"* mucîbince tedâif-i ümm-i kitâbda mastûr olan amme-i esmâyı ta'lîm ve kâffe-i hâkâyık-ı lâ-yuhsâ-yı tefhîm edüp câme-i kâbiliyeti ben-i âdemi tîrâz *"ve ceâlneke halîfeten fil ard"* ile muttaraz ve cerîde-i dilkeş hil'atını *"ve enzellallâhul kitâbe ve'l hikmete"* mazmûn-u hümayûnuyile müşerrez kılıb hezâr-ı ta'zîm ve tekrîm ve iclâl ve tefhîm ile ol debistân-ı bihişt-i âyin içre hilâfet-i emrin anlara ta'yîn etti *"zâlike fadlullâhi yu'tihi men yeşâu vallâhu zü'l fadlil azîm"* ve revâyîh-i salâvat-ı şâika ve fevâih-i teslîmât-ı râika ki nefehât-ı âsârından meşâm-ı cân-ı muattar ve lemeaât-ı envârından zemîn ve âsumân münevver ola hemvare ol Ben-i hâşimiyy kâmil Sultân-ı ârifân-ı deryâdil imâm-ı cemâ't-i mürselin câmi'-i ulum-i evvelîn ve ahirîn ser çeşme-i kevser-i Hüdâ andelib-i gülşen *"Ve ma yantiku anil hevâ"* nübüvvet-i tâmme sûresinin fâtihâsı risâlet-i âmme risâlesinin hâtimesi hâtemi'l enbiyâ-i ve rüsûl hâdiü'l-halâika

ila akvemi's-sübül Nazım: Muhammed kîst cân-râ kurretü'l ayn kemân-ı ebru-yı bezm-i "kâbekâvseyn" dileş ez-ma'rifet ber evc-i eflâk zibâneş der-makâm-ı "mâ arâf nâke" Nesir: "Lâ zâlet riyazu'd-dehri müzeyyetenen bi-ezhâr-ı şer'îhi'l-mutahhar ve zülûmâti'l-hacbi ve'l estâr mürtefi'âtun bi envâri dinihi'l-ezher" hazretlerinin ravza-i râziye ve hatire-i hatîrelerine nîsâr ve 'isâr olunur sallallâhu aleyhi ve a'lâ alihil etkiyâi'l-berere ve sahibihî'l-asfîyâi'l-hıyyere el-mütevellîne a'lâ hıfzı'd-dîn ve hırâsetihî ve siyânetihî's- şer'i ve ri'âyetihî mâ züyyinet'il ardu'l mesâcide ve hasuneti's-savâmiü'l-bi'r-râki-i ve's-sâcid

1. Mâ hüve'l-mastûr fi hâze'l kitâb sahha indi hâliyen an irtiyâb ve enel fakîru inallahil âliyyil kebîr Sinan bin Abdulay el vezir
2. Mâ havahu fahval kitâb vâki'un bilâ şübhetin ve irtiyâb ve enel fakîru illellahil azîzi'l-kadir İbrahim bin Abdulmuti el vezir
3. El emru kemâ hurrîre eş-şe'nu a'lâ mâ sutire ve ene'l fakîru ilallahi'l aziz el müsteân Mehmed bin Abdurrahman el vezir
4. El emru kezâlik ve ene şâhidun bi zâlike ve enel fakîru inallahil Melîki'l-hayr Hasan bin Abdulhayr el vezir
5. Mâ tedemmenahu hâze'l-kîtâbi'l-müstetâd vâki'un bilâ şübhe ve irtiyâb ve enel fakîrun innellahi'l melikü'l kâdir Sinan bin Abdulkâdir el vezir
6. El menzûru fi hâze'l bâb kemâ zukire fi hâze'l-kitâb ve enel fakîru ilallahi'l Melîki'l-basîr Halil bin Abdurrahman el vezir

Mâ hurrîre fi haze's-sifri's-şer'i ve zuberid-dini min asli'l-vakfı ve mesârifihî ve şerâ'itihî ve tesbîl ve kavâidihî ve zevâbitihî sahha ledeyye ve sebete beyne yedeyye fi mahfel'iş-şeriâti'l-garrâ ve meclisi'l-milleti'l-hanifiyyeti'z-zehrâ ve inni kadaytu bi sıhhati ve lüzûmuhi aslen ve feran a'lâ vechin tuaddu bihi ve dînen ve şer'an âlimen bi mevâzi'il-hilâf beynel eimmeti'l-eşrâf ve murâiyeni'l mevte asarehu fi'l-kada-i bi evkâf ve eşhedtu alâ- kadâi fi heze cem'an minel addi's-sıkat el ümenâil isbat ve ene afkârul ibad Ali bin Yusuf el-müvellâ bi'l asâkîri'l-mansûre fi vilâyet-i Rumeli el ma'mûre ufiye anhumâ

Gazanfer Ağa'nın vakf ve hâbs etmiş olduğu vakfiyenin suretidir.

Ve b'ad bâlâ nîşîn-i evvân-ı irfân olan nâ-dânâ-yı habîr-i nüktedâna puşîde ve nihân değildir ki her âkil-ı lebîb ve kâmil-i erîbe lâzım ve lazîb ve mühim vacibdir ki şem' gibi envâr-ı aklını başına cem' edüp bu zulmet âbadi bünyâda kanden gelmiştir ve kande gitse

gerek teecessüs eyleyüb ana göre levâzım ve mühimmât tedârik eylemek gerektir nitekim emir-i müminîn sultân-ı ârifin şîr-i Hüdâ şimşir-i Hüdâ ser halka-i silsile-i evliyâ çeşm-u çerâğ-ı cemi'-i esfiyâ Esadullâhi'l-Gâlib Ali ibn Ebu Tâlib kerremallâhu vechehu hazretleri bu mânâ-yı rânâya işaret eyleyüb *“Rahîmallâhu imreen ahaze li nefsihi ve isteadde li remsihi ve alime min eyne ve fi eyne ve ila eyne”* deyu buyurmuşlardır öyle olsa bu gülşen-i rûşen pür iber içre abher-i ter gibi âlî nazar olanlara hafî değildir ki bu gülzâr-ı hezâr etvâr ve bu murgzâr-ı murgezar cây-ı huzûr ve sarây-ı sürûr olmayıp nâimine zevâl mukîmine irtihâl vâridîne sudûr nâzilîne ubûr mukarrerdir bu hâne-i virânın imrânı harâb bünyânı yebâb kubâbı hubâb gibi tarfetü'l-ayn içre nâyâb olub lemeât-ı vücûd-u bitâbı lemhâ-yı serâb ve nakş-ı âb gibi heman bir hayâl-ı hâbdır Nazım: mevc-i deryâst in-cihân-ı harâb bî-sebâtest hemçü nakş-ı berâb Nesir: Bu cobyârgeç refter ve acübü'l-etvâr kangı serv u nâz u izz ü nâziyla kenârında besledi ki ahergâh teber-i tebâr ile sayevâr hâke berâber edüp arre-i bevâr ile sinesîn sâdpâre etmeye ve bu gülizâr-ı muhtelifü'l-ahvâl kangı nihâl-ı gül a'lâ perversin verdiğim akıbet şûle-i nâr-ı damar ile nahl-ı gülnâr gibi serâba bakup rüzgâr ile her zerresin bir vadîde avere etmeye nazm ve tâcı mevfûrun ibtihâc hüsrevânesi cenâb gibi bî bünyâd altun benekli hil'âtı halka halka dâm ve dürr ve güherpür kıyâmet-i eşk dîdeyi eytâmdır hâsilı tuğrâ nevis-i menâşir-i ezel azze şanuhu ve celle dergâh-ı azemât-ı penâhinden bu dârü'l-mülk pür vâhil ve cüllü sükkânına berât-ı müsellemi verilmeyüb şâh ü gedâ ve mir u ağa bu emirde ale's-sevâ olub hiçbir kimsenin yırlığı belîğ zindigânîsine tevki-i refii câvidân-ı erzâmı kılınmadı Beyit: *“ve'lev kaneti'd- dünyâ te'dumu li vâhidin le kane Resûllullâhi fiha muhaleda”* öyle olsa basâ'ir-i selime ve tebâyi'i müstâkime ashâbınâ belki derûnunda zerre kadar imanı ve bir reşha kadar îzânı ve irfânı olanlara vâcib ve mühim ve lazîb ve lâzımdır ki hâlâ zamân-ı ihtiyâr elde iken burâk-ı berk-i seyr ü hemte süvâr olub bu mezra'a-i fâhireden dâr-i ahirete münâsib zâd ve itât ki hayrât ve hasenât ve tâ'at ibâdetdir hasbel kudur ve kadri'l meysûr iddihâr ve ittizâd eyleye ki anda tedârik-i esbâb ve mühimmat ve tehiyye-i levâzım ve mülimmâtı mümkün olmayıp bir ferdden bir ferde meded ve fâide ve bir kesten bir kese menfa'ât ve âide olmayub *“küllü imriin bi mâ kesebe rehîn”* mûcibince herkesin keyfiyet-i hâl-i a'mâline menût ve efâline merbûttur ve dahi şübhe yoktur ki sadaka ve infâk ale'l-ittlak enfâ-i vesâil ve efdâl-i nevâfildir *“kemâ kâle azze min kâilin”* *“meselüllezine yünfikune emvâlehüm fisebilillâh kemeseli hâbbetin enbetet seba' senâbiyle fi küllü sünbületin mietü hâbbetin”* ve kalen Nebîyyu aleyhisselam *“Leyse leke min malikin illâ ma ekelte fe efneyte evlebiste fe ebleyte ev tesâbdakte fe ebkayte”* ve dahi ashâb-ı akl-ı selîm ve erbâb-ı tâb-ı müstahkîme hâfî değildir ki sadaka ve infâkın menâfi'i ebedül âbâd kâim ve fevâidi ilâ yevmîd tenâd dâimdir envâ-i sadakâtın ekmeli ve esnâf-ı hasenâtın emsâli vakıftır ki fevâidi

ber devâm avâidi bî hitâm naîm cinâm gibi feyzi kesilmez ve rahmed-i Rahman gibi bezille eksilmez nitekim hazret-i resûl-i ekrem sallallâhu Te'âlâ aleyhi ve sellem bu manaya işâret buyurmuşlardır *"İza mate ibn ademu inkataa amelehu illa an selasin sadakatun câriyetun ve ve'ledun salihun yed'u lehu ve ilmun nafiun"* pes imdi bu devlet-i câvidâni ve sa'âdet-i dü cihân-ı hilâfet-i rûy-i zemîne halîk ve ma'rifet-i rabbi'l-âlemîne hakîk olan selâtîn-i Âl-i Osman ve esâtîn-i selâtîn cihân ebka humullâhu Te'âlâ ila intihâi'd-devrân hazretlerinin selef ve halefine hasbel imkân müyesser ve mukadder olub esası cihân bi sebât ve esbâb-ı cihân pür fevat olduğuna ârif olduklarına binâen esnâf-ı hayrât ve envâ-yı hasenât inşâ ettiklerinden gayr, harem-i muhteremlerinden muharrem olan zükûr ve inâsın her birinden nice esrâr-ı cemilü'l-mikdâr ve âmâl-i cezilü'l-âsâr zuhûr etmiştir husûsen bu sa'âdet-i dâime ve bu siyâdet-i kâimeye muvaffak olan cenâb-ı ali makârr-ı meâsir ve ma'âliyi sâhib-i kadîr refîu sâhib-u ezyâl câh-i meni-i menbâ-i mehâsin ve kerem-i mazeri maraz ve şiyen nâmûs-ı esrâr-ı zevât-ı uzmâ kâmûs-ı bihâr sa'âdet-i ulyâ haiz riyasetin faiz-i fâziletayn kârînü'l- hazreti aliyetü'r-refiâtü's-şân rehînü'l-hıdmeti's-sâmiyetil ve meniâtü'l-eyvân el mahfûfu bi sunûfi avâtıfu'l Melîkü'l Mennan hâlen bâb-ı sa'âdet-i meâbda kapu ağası ve oda başı olan Gazanfer Ağa ibn Abdurrahman edbedâllâhu devletuhu en kahire a'le'l istimrâr ve't-tevâli ve hallede şevketehu'l bâhire medel eyyâm ve'l-leyâlî hazretleri sıdk-ı niyet ve hulûs-ı taviyyet ile mâl-ı helâlinden ve etyâb-ı envâlinde envâl-ı âtiyetü'l-beyânı fi sebilillâhi Te'âlâ bezl edüp Nazım: *"İnne âsâruna tedullu aleyna fenzur ve ba'dena ilel âsar"* nesir deyu ebniye-i hayrât ve hasenâttan bazı makbûl ve matbû' ve dil gûşa ebniye-i şerîfe inşâ edüp ecnâsı ahabâs-ı şer'îye ve esnâf-ı evkâf-ı merîye nâzım ve tertîb edüp tahavvülât-ı zemân ve tebeddülât-ı deverân ile tagayyur ve ihtilâl ve fenâ ve zevâl ârız olmamak için ahkâm-ı vakfi ihkam ve tescîl ve şerâ'it ve zevâbiti itmâm ve tekmîl kasd olunup hazret-i vâkîf aliyyü'z-zât ve meşrûhü's-sıfât edâmallahu Te'âlâ devletuhu medel eyyâm ve'l evkât kabîlinden vekîl-i mutlak ve amm ve her husûslarında kaim-i makam olan hâlâ matbah emini Ömer Çavuş ibn Ali'nin vekâlet-i tamme ve niyâbet-i ammeleri Ali Ağa Ser Hazin-i Bayezid-i Veli ve Kâtib Abdi bin Mustafa şehâdetleriyle meclis-i şeri' şerîfi mutahhar ve mahfel-i dîn-i münîf-i ezherde sâbit ve zâhir ve mütehakkık ve bâhir olduktan sonra ikrâr-ı sahîh-i şer'î ile ikrâr ve îtirâf edüp beni vekîl eden müşârünileyh ağa-yı rûşen-i rey hazretleri la zâlet âyâtu celâlihi metlûveten fi cevâmi'il-melîki ve'l melekut ve nuut-ı kemâlihi mezkûreten fi mecâmi'il-kuds ve'l ceberrût *"İnnemâ ya'muru mesâcidallâhi men âmene billâhi vel yevmil âhir"* mazmûn-ı fâhirinde işâret olunan müminîn uli'l-mefâhir silkinde muntazım olmak ricâ edüp ve dahi *"men benallahe mesciden benallâhu lehu beyten fil cenneti"* hadis-i şerîfi mütezammın olduğu va'd-i Kerîme rağbet ettikleri ecilden vilâyet-i Anadolu'da Gedus nâm kasâbada bir câmi'-i lâmi ve ma'bed-i nâfi'

binâ ettiler ki hüsn ü binâ ve vu's-i fenâyla reşk kasr-ı irem ve tâk-ı mualla ve kubbe-i ulyâyla ser amedî âlemdir mezkûr câmi'-i pür nûr müşârünileyh ağa-yı rûşen rey-i hazretlerine intimâyla meşhûr olmağın tahdîd ve ta'rîf ve tebyîn ve tavsîfden müstâğnidir vâkıf-ı müşârünileyh hazretleri ol câmi'-i mesfûr lâmiu'n-nûr ikâmet-i salavât-ı mektûbe ve ibâdet-i mergûbe eden kâffe-i ehl-i İslâm ve amme-i ibâd râbbi a'lâihi ki “ *yezkurunallahe kıyâmen ve kuûden ve yakifune fi mesacid-i rükkeân ve sucûden*” mazzmûnuyla ma'rufetu'l-ittisanlardır hâlisen li vechillahil Kerîm ve ibtiğâen li marzati râbbihi'Rahîm “ *yevme la yenfeu mâlun ve lâ benûn illa men etallahe bi kalbin selim*” vakf ve hâbs ettiler ve dahi vâkıf-ı Mumâileyh efadallâhu sicâle feyzihi aleyhi hazretlerinin ilm-i şerîfleri muhîd oldı ki Kur'an-ı azim ve kitâb-ı kerîm lâzımü't-tekrîm fi'l-hakîka nur-ı mubîn hâbl-i metîn şefiü'l-müznibîn ve hayy u rabbi'l-âlemindir pes ol kelâm-ı kadîm ve zikr-i hekimin taallüm ve ta'lîminde rivâyet-i sahîha ile rivâyet olunan müzd ü sevâb ve ecr-i bî hesâb ki binde birini tahrîr ve tasvîr meysûr-ı aklam hoş hurrem değildir şera sehande Mu'az bin Cebel hazretlerine isnâd ile nakl olunan hadis-i bî bedel bu husûsta tamâm-ı kâfi ve vâfidir ol kitâb-ı müstetâb içre Resûl-i ekrem sallallâhu aleyhi ve sellem hazretlerinden nakl olunur ki kıyâmet gününde ehl-i Kur'an izz ü huzûr perverdigâr-ı Rahîm ve Rahmana davet olunub her birine re'sen birer tâc-ı vehhâc ihсан oluna ki her tâcın yetmiş bin rüknü olub her bir rüknünde birer yakût-ı ahmar ola ki her birisi mühr-i enver gibi nice günlük yerlere ziyâ küster ola ba'de ez an birer hülle-i zibâ ve hil'at-ı dibâ(zibâ) erzân kılına kim tar u pudi rikkat ve letâfet ile rişte-i cân gibi gözden nihân ve nakş-ı nigarının gül rânesi hasretiyle çeşm-i bülbül gibi hemîşe giryândır andan sonra dergâh-ı ilâhîden her birine birer nûr-ı afitâb zuhur-ı fâiz olub emr-i ilâhî ile heftâd-ı hezâr âb-ı rahmed ile sirişte-i firîşteler önlerine düşüp hezâr-ı iclâl ve ta'zîm ve i'zâz ve tekrîm ile kasr-ı bî kusûr bihişte îsâl eyleyüb Kur'an-ı Azimden okuduğu her harf mukâbelesinde cennette birer cennet-i illiye ile birer derece-i âliye verile ki her iki derecenin mâbeyni yüz yıllık mesâfe ola Kur'an-ı Azimi dünyadaki gibi okuyup ol deracat-i âliyâta afitâb-ı seriü'l harekât gibi u'rûc edüp bir lülü-i sâf ve kevkeb-i dürri gibidir seyrah-i şeffâftan acîb ve tarh-ı dîl firîib üzre binâ olunmuş bir tarafa gurafiye-i ibrişâlâr giyem ol gufre-i âliyenin her bâbdan yetmiş bin bâbı olub evvelki bâbdan heftâd-ı hezâr şükr-i güftar ve hoş refter-i zibâ rûy-ı müşkin moy melekler ki her birinin rûy-ı çeşme-i afitâb gibi lücce-i nûr ve bûy-ı dîlcûy katında misk ü anber bî kadr ü mehcûr olub dergâh-ı â'zamât-ı penâh-ı perverdigârdan selam getirüp “ *Selâmun aleykum bimâ sâbertum fenime'ukbeddâr*” deyu getirdikleri tuhâf ve nevâdir ve acâyib ve garâyib cevâhir-i nîsâr edeler ikinci kapusundan iki evvelki kadar melekler gelüp bunlar hüsn ü cemâl ve lütf ü kemâlde ve tuhâf-ı gûn a gûn ve hedâyâ-yı bediatü's-şuunda evvelkilerin dı'fı kadar olub bu üslûb-u mergûb üzere ol yetmiş bin kapunun her birinden

gelen melekler kendüden evvelki bâbdan gelenlerin dı'fi olmak hesâbı üzere bî had ve hesâb melâikeme tâlât ve süreyyâ cenâb gelip hazret-i izd-i bî çûn ve hallâk-ı âlem “*Künfeyekun*” dergâhından selamlar ve tuhfeler getirüp ol kadr-i ta'zîm ve tekrîm ve iclâl ve tevhîm ideniz ukûl-ı beşer derkinde kâsır ve aklâm-ı ehl-i hüner tahrîrinde mütehayyir ola ve rivâyet olunur ki zikr olunan ehl-i Kur'anın babasını anasını dahi cennete koyup evlâdının okumasına sebep oldukları için can oğulları kadar bilâ tefâvüt derecât-ı âliyât verilir anlar kadar ta'zîm ve tekrîm ve iltifâta mazhar olur sadaka habîbullâh ve sadaka resûllullâh ve dahi resûl-i ekrem sallallâhu aleyhi vessellem hazretlerinden Ebu Hüreyre radiyallâhu anh rivâyet buyururlar ki “*Men ekreme âlimen fe kad ekreme seb'îne Nebîyyen ve men ekreme müteallimen fe kad ekreme seb'îne şehiden ve men ehâbbel ilme ve'l ulemâe layuktebu hatietuhu eyyame hâyatihî*” sadaka rasullullâh ve sadaka hâbibullâh ve dahi İmâm-ı Gazalî aleyhi rahmedü'l-Melîkû'l müteâl ihyâda zikreder ki hoca-i kevineyn ve resûl-u sekaleyn ve imâm-ı kıbleteyn hazretlerinden mervîdir ki “*men seleke tarîken yadlubu fihî ilmen selekallâhu bihi tarîkan ile'l-cenneti*” ve kâle “*innel melaikete le tedâu ecnihatuha li tâlibi'l-ilmî*” ile olsa zümre-i ezkiyâ ve ekyâs bu haber-i sıhhat eserden kıyâs eylese olur ki bir sâhib-i hayr-i Kerîm niyet-i hâlîsa ve kalb-i selim ile taallum ve ta'lîm-i Kur'an-ı Azîm için dârü't-ta'lîm ve vücûh-ı kıraat ile nazm-ı şerîfî tilâvet için darü'l-kurrâ binâ eylese tahsîl-i u'lûm-i şer'îye ve tekmîl-i fûnûn-ı nakliye için fukâra-i tâlibîn ve zümre-i müstehakkine medrese-i şerîfe binâ edüp hasbeten lillâhil mecid ahâlisine vakf ve hâbs ve te'bîd eylese her zamân ve her asırda ne kadar ulemây-ı sâhib-i eser ve fuzelây-ı din perver zuhûruna sebep olur ve her birinin zuhûruna sebep olub terbiyet ve tenniyet ile ne kadar mislü sevâb ve ecr-i bî hesâba müstehak olduğu tamam zâhir olur binâen a'lâ zâlik vâkıf-ı müşârünileyh hazretleri dâr-ı saltanat-ı seniyye mahmiye-i **Kostantiniye'de Kırkçeşme demekle ma'rûf bir mahal-i latîfte dört yol ağzında on yedi aded hücre ve dersihâne-yi müştemil makbûl-i cumhûr ve matbû'-u ehl-i şu'ûr bir medrese-i şerîfe binâ ettiler ki tarh-ı cedîd-i dîlîfirîb kılıb nâzırına safâ ve tarz-ı sedîd bediü't-tertîbi âyine-i dilhâyı hâtırına cilâ verir mezkûr medrese-i şerîfeyi tahsîl-i u'lûm-ı şer'îye ve tekmîl-i fûnûn-ı nakliye eden kâffe-i ehl-i ilm ve amme-i talebe-i müştagilîne vakf ve hâbs etti ve medrese-i ma'mûreleri civarında cennet-i aden bi adile müşâbih bir makam-ı âli-yi nihâda binâ ve âbâda eyleyüb ber müceb-i “*Küllü nefsin zâikatü'l-mevt*” mübteğasınca bedr-i ömrü husûf ve şems-i kadri kûsûf bulup devlet-i dünyây-ı fânîye izzet-i ukbây-ı bâkîye ile istibdâl ve civâr-ı rahmed-i Hayy-i müteâl intikâlda isti'câl ettikte cism-i latîfî ve kalid-i tadyîfî üzere tilâvet-i kelâm-ı kadîm gerdigâr ve tesbîh ve tahmîd ve ezkâr-ı perverdigâr olmağla rûh-ı pür fütûh-ı mukaddesleri şâd olmak için bir mezâr pür envâr-i akdesi bünyâd eylediler ve bundan mâ'adâ câmi'-i sâlifü'l-beyâna muttasıl bir mekteb-i âli ünvan binâ ettiler ki sahâif-i bünyânında ayet-**

i letâfet mastûr ve matâvi erkânında âsâr-i melahât menşûrdur zikr olunan bâni-i Kerîm-i mesfûr dâru't-ta'limi taallüm ve ta'lim-i Kur'an-ı Azim ve telakkını telkîn-i kitâb-ı kerîm eden etfâl-i müminîn ve evlâd-ı muvahhidîne ve mu'allimlerine hasbeten lillâhil âlim ve taleben li-merzati rabbihi'r-Rahîm ” *yevme lâ-yenfa'u mâlun ve-lâ benun illâ men etallahe bi-kalbin selîm* ” vakf ve habs ettiler ve enhâr-ı sutûr-u mevfûru's-sürûr içre zikr-i cemilleri câri olan mezkûr ağa-yı rûşen rey-i afitâb zuhûr hazretleri tesbîl-i niyah-i selsebîl-i eşbâh dahi hayr-i azim olub anın müzd-u sevâbını hesâb ve ecr-i bî-hesâbını adl ve hadd ile isti'âb mümkün olmadığına muttali' olduklarına binâen medrese-i sâlifetü'l evsâflarına muttasıl dört yol ağzında makbûl-ı cumhûr ve matbû'-ı ehl-i şu'ûr bir sebil-i bî-adîl binâ ettiler letâfette rûhâm-ı selîm hâmi etti bi-rağbet mücellâ mermeri mucin görenler sandılar hârâ kasâba-yı Üsküdar civarında merhûm İbrahim Ağa zâviyesi kurbunda ebnâ-yı sebil için tarîk-i âmm üzere bir çeşme-i bî adîl binâ ettiler ki tâk-ı dilcivini seyr için mah-ı nevbân-ı feleğe çıkmış ve zülâl-ı cân bahş görüp âb-ı hayât yerlere geçmiş mezkûr çeşme mürûr ü u'bûr eden kâffe-yi müminîn ve amme-i muvahhidîne vakf [ü] tesbît ettiler ve dahi kasâba-i merkûmede mevâzi'-i müteaddîdede binâsı hob vâz'-ı merğub altı adet çeşmehâ-yı bedi'âtü't-temâsîl binâ etmişlerdir zikr olunan mevzi'in birisi vâkıf u sâlifü'l-evsâf binâ ettikleri câmi'-i şerîf kurbudur ve birisi dahi kasâba-i merkûmede bakkallar sükudur ve birisi dahi buğday pazarıdır ve birisi dahi Şeyh Mahallesi'dir ve birisi dahi kasaba-i merkûm hâricinde musalla ittihâz ettikleri makamdır ve'l-hâsıl müşârünileyh ağa-yı âli şân ve vâkıf-ı ârif-i kerdân hazretleri bu kitâb-ı müstetâb neyyiru'l-burhânın nihâl-ı satır-ı mevzû'nu üzere şükûfe-i terkîbi ferâid ism-i muntazım ve sahâyif-i latâyif-i meşhûnu üzere süreyyâ-yı enver gibi kalâid zikr-i mülteim olan câmi'-i şerîf ve medrese-i münîfe ve dârü'l-kurrâ ve mekteb-i latîf ve çeşmeler cemi'an vâkıf-ı mezfûr cenâb-ı şerîfine intimâyla meşhûr olub ta'rîf ve tahdîden gâni ve tebeyyün ve tavsîften müstağnilerdir her birini hasbeten lillâhil celil ahâlisine vakıf tesbîl ettiler *“tekâbellâhu Te'âlâ min hazihil evkâf bi lütfîn vafîn ve menni kafîn ve ceale ecre ahadi evkâfihi misle ahadi evkâf”* ba'de izn müşârünileyh ağa-yı ferhûnde rey ve pür temkîn dîde-i akl-ı dûrbîn ile nazar edüp zikr olunan ebniye-i hayrât ve âsâr-ı hasene-i hasenâtın mesâlih ve mühimmâtı ve bekâsının levâzım ve mühimmâtı için esnâf-ı evkâf ve envâi'l-müstegallât âtiyetü'l-evsâf tedârik buyurdular ta ki âsâr-ı bedi'âtü'l-etvârları çehre-i rüzgâr bî karârda sâbit ve ber-karâr olub kendülerden sonra uluvv-i himmet ve kemâl-i mürüvetlerini müzekkir bir yâdigâr koyup elsine-i nâsda zikr-i cemîl-i dâimâ mezkûr ve defter-i hasenâtta ecr-i cezîli dem be dem mastûr oluna zikr olunan müstegallât-ı evkâftan birisi mahmiye-i Kostantiniye'de Ahur kapısına karib merhûm İshak Paşa Mahallesi'nde ber cây-ı dîlîrîbden binâ ettikleri menzili refi' ve mesken-i meni'dir menzili merkûm muhavvitâteyni müştemil olub

dâhilîyesinde tahtânî sekiz bâb odayı ve fevkânî yirmi beş bâb odaları ve çifte hamâmı ve hâricî ve dâhilî beş yerde cârî kâmil iki lüle mâ-i azbı müştemil olub ve hâricîyesinde tahtânî yedi bâb odaları ve fevkânî on bâb odaları ve iki bâb matbahı ve iki bâb âhûru bi'ri mâ-i ve muhavvata ve kenâifi bundan mâ'adâ büyü-tü dâhilîyeye mülâsık bir bâb odayı ve muhiti müştemil olub hududu bir taraftan Süleyman Ağa ibn mülküne ve bir taraftan Mustafa Çelebi mülküne ve bir cânibi merhûm İshak Paşa Mescidi ile hamâmına ve bir tarafı tarîk-i âmma muttasıldır ve birisi dahi mahrûse-i merkûmede Ayasofya-i Kebîr kurbunda mîrî nakkaşhâneye muttasıl hândır zikr olunan hân tahtânî âhûru ve iki bâb mahzeni ve fevkânî yirmi dört odayı ve tarîk-i âmm tarafında kapuya muttasıl üç bâb dükkânı ve fevkinde dört bâb odayı ve anın fevkinde bir bâb büyük odayı müştemil olub hudûdu bir taraftan Ali Bey ibn Ahmed mülküne ve bir cânibi nakkaşhâneye ve bir cânibi Molla Kasım ibn mülküne ve bir cânibi tarîk-i âmma müntehîdir ve birisi dahi mahrûse-i merkûme esvâkinden Tavuk Pazarı demekle mâruf olan sükda fevkânî ve tahtânî üç bâb odaları ve iki bâb dükkânı ve bir bâb mahzeni müştemil olandır hudûdu bir cânibden Ayasofya evkâfindan Esir Hânı demekle ünvan bulan hân ve bir cânibden zikr olunan hânın âhûruyla Ali Ağa binâ ettiği menzile ve bir cânibden tarîk-i hâssa müntehîdir ve bundan mâ'adâ mukâbelesinde bir bâb dükkânı ve bir bâb hâyat dükkânını bunların fevkinde büyük odayı müştemil olan menzildir hudûdu bir cânibden sâlifü'z-zikr Esir Hânı'na ve bir cânibi Ayasofya vakfına ve bir cânibi Silâhdâr Mustafa bin Abdullah mülküne ve bir cânibden tarîk-i hâssa muttasıldır zikr olunan dekâkîn ve odaların arsası Ayasofya evkâfindan olub beher sâl vakf-ı merkûma yedi yüz yirmi akçe mukâta'a'sı vardır ve birisi dahi mahrûse-i mezbûrede beynen-nas büyük kâraman demekle şöret ve ünvan bulan mevzide vâki' handır ki tahtânî istâbl-ı kebîri ve fevkânî yirmi altı bâb odayı ve on beş aded dükkânı müştemil olub hudûdu bir taraftan sâbıkan şeyhülislâm olan merhûm ve mağfûrunleh Sadi Efendi Vakfı ile ve merhûm Cerrah Üstad Ali Vakfına ve bir cânibden Mahmud bin Mehmed Yeniçeri ve Ahmed bin mülklerine ve iki cânibden tarîk-i âmma müntehîdir arsasının senevî Ayasofya vakfına yedi yüz kırk akçe mukâta'a'sı vardır ve birisi dahi mahrûse-i mezbûre ebvâbından Aya Kapusu kurbunda vâki' Yenikapu demekle meşhûr olan kapu hâricinde fevkânî iki bâb odayı ve tahtânî beş bâb dükkânı ve bir kayıkhâneyi müştemil menzildir hudûdu bir cânibden Yorgancızâde demekle ma'rûf Seyyid İsmail mülküne ve iki taraftan iskele ile deryâya ve bir cânibden tarîk-i âmma müntehîdir arsasının senevî Ayasofya evkâfına otuz altı akçe mukâta'a'sı vardır ve birisi dahi mahalle-i mezbûrede vâki' fevkânî üç tabaka odalardır tabaka-i ulyâda bir odayı ve bir tahtapoşu ve tabaka-i vustâda bir odayı ve bir sofayı ve tabaka-i süflâda bir kayıkhâne ve arsa ve kenîfi müştemil menzildir hudûdu bir cânibden mezbûr Yorgancızâde mülküne ve bir tarafı deryâya

ve bir tarafı Yanaki veledi Hristo mülküne ve bir tarafı tarîk-i âmma müntehîdir ve birisi dahi Ayakapusu dâhilinde Tahta Minâre Mahallesi'nde vâki' menzildir ki hâricîyesinde fevkânî iki bâb odayı ve tahtânî iki bâb odayı ve iki sofayı ve âhûru ve bi'r-i mâ-yı ve kenîf ve dolaplı su kuyusuna ve yol aşuru köprü ile u'bûr olunan menzilin dâhilinde üç bâb fevkânî odaları ve üç bâb tahtânî odaları ve iki sofayı ve bir kileri ve bir matbahı ve bir hamâmı müstemil olub, hudûdu bir cânibden Yahya Subaşı mülküne ve bir cânibden tarîk-i hâssa ve bir cânibden Papa Petro veledi İstimad mülküne ve bir cânibi kale duvarına müntehîdir ve birisi dahi menzili mezbûr kurbunda iki bâb fevkânî odayı ve bir mahzeni ve bir şirgan değirmenini müstemildir hudûdu bir cânibden Yayabaşı Ramazan Çelebi mülküne ve bir cânibi müşârünileyh ağa hazretlerinin vakfına ve bir cânibi tarîk-i âmm ile mahdûddur ve birisi dahi mahâli mezbûrda üç bâb fevkânî odaları ve üç bâb tahtânî odaları ve dehlîzi ve muhavvatayı ve bi'r-i mâ-yı ve kenîfi müstemil menzildir hudûdu bir taraftan mezkûr Ramazan Çelebi mülküne ve bir tarafı müşârünileyh ağa hazretlerinin vakfına ve bir tarafı tarîk-i âmm ile mahdûddur arsasının senevî Pamukçubaşı vakfına seksen akçe mukâta'a'sı vardır ve birisi dahi mahâl-i mezbûrda üç bâb fevkânî odayı ve üç bâb tahtânî odayı ve iki matbahı ve iki kileri ve kenîfleri mahdûd menzildir hudûdu bir cânibden tarîk-i âmma ve üç cânibi müşârünileyh ağa hazretlerinin evkâfına müntehîdir ve birisi dahi mahrûse-i mezbûre ebvâbından Topkapısı kurbunda vâki' hadîkâdır ki dâhiliyesinde iki bâb tahtânî odayı ve bir hamâmı ve bi'r-i mâ ve eşcâr-ı müsmireyi müstemil menzildir hudûdu üç taraftan tarîk-i âmma ve bir taraftan Keşci Muslu mülküne müntehîdir ve birisi dahi mahrûse-i merkûmede Langa kurbunda Çaker Ağa Mahallesi'nde vâki' on dört bâb fevkânî ve tahtânî odalardır hudûdu bir taraftan Alime Hâtun mülküne ve bir taraftan Sarâyılı Hâtun mülküne ve bir taraftan mezbûr Çakır(Çaker) Ağa vakfına ve bir taraftan tarîk-i âmma müntehî odalardır ve birisi dahi mahalle-i mezkûrede dokuz bâb fevkânî ve tahtânî odalardır ki hudûdu bir taraftan Hüseyin Subaşı mülküne ve bir taraftan Çakır(Çaker) Ağa vakfına ve bir taraftan Kuyumcu Muslu mülküne ve bir taraftan tarîk-i âmma müntehîdir ve birisi dahi mahrûse-i merkûme ebvâbında Âhûr Kapusunun hâricinde vâki' kayikhânedir ki fevkânî iki bâb odayı ve tahtânî bir bâb odayı ve bir mahzeni müstemil menzildir ki hudûdu bir cânibden hisara muttasıl ve bir cânibden deryâya müntehîdir ve birisi dahi mahrûse-i mezbûra ebvâbından Aya Kapusu kurbunda vâki' Yeni Kapu demekle meşhûr olan kapı hâricinde fevkânî iki bâb odayı ve tahtânî beş bâb dükkânı ve bir kayikhâneyi müstemil menzildir ki hudûdu bir cânibden Yorgancızâde demekle mâruf Seyyid İsmail mülküne ve iki taraftan iskele ile deryâya ve bir taraftan tarîk-i âmma müntehîdir arsasının senevî Ayasofya evkâfına otuz altı akçe mukâta'a'sı vardır ve birisi dahi mahrûse-i merkûmede Kızıl Musluk demekle mâruf

mahallede vâki' menzildir ki istâblı ve fevkânî bir bâbhâne ve bir çörekçi fırını ve muhavvata-i müştemildir hudûdu bir taraftan tarîk-i âmma ve bir taraftan tarîk-i hâssa ve iki taraftan ve birisi dahi mahrûse-i mezbûrede merhûm ve mağfûrunleh Sultân Bayezid Han aleyhi'r-rahmetu ve'l gufran hazretlerinin Câmî'-i şerîfleri kurbunda üç aded dükkânlardır ki hudûdu bir taraftan vâkıf-ı mûmâileyh hazretlerinin imâret-i amirelerinin un ambarına muttasıl ve iki taraftan vakf-ı mezbûrdan Zeyrek Ağa tasarrufunda olan dükkâna ve bir cânibden tarîk-i âmmı muttasıldır arsasının senevî Sultân Bayezid Han Vakfı'na bin yüz akçe mukâta'a'sı vardır ve birisi dahi mahrûse-i mezbûrede İshak Paşa Mahallesi'nde vâki' muhavvatâteyni müştemil olan menzildir ki muhavvata-i dâhilîyesi üç bâb büyût-ı ulvîye-yi ve fırını ve bi'r-i mâyı ve kenîfi hâvi olub muhavvata-i hâricîyesi dört bâb ulvî evleri ve altında bir bâb âhûru ve kenîfi ve üç bâb tahtânî odaları müştemil olub hudûdunun bir tarafı vâkıf-ı müşârünileyh ezezallâhu sicâle feyzihi aleyh hazretleri vakfına ve bir cânibi Osman bin Abdullah mülküne ve bir cânibi Oruç bin Abdullah mülküne ve bir tarafı tarîk-i hâssa müntehîdir ve birisi dahi mahal-i mezbûrede vâki' olub fevkânî ve tahtânî yedi bâb hücerâtı ve kenîfi hâvi olan menzildir ki hudûdu bir taraftan Oruç bin Abdullah ve Rıdvan bin Abdullah mülklerine ve bir tarafı merhûm Nalbant Mustafa vakfına ve iki tarafı tarîk-i hâssa müntehîdir ve birisi dahi mahalle-i mezbûrede vâki' dört bâb tahtânî odalardır ki hudûdu bir taraftan merhûm Sinan Paşa Vakfı'na ve bir taraftan Nalbant Mustafa Vakfı'na ve bir taraftan Süleyman Ağa ibn Abdullah mülküne ve bir cânibden tarîk-i hâssa muttasıldır Zikr olunan odaların arsası (boşluk) vakfından olub senevî vakf-ı merkûma kırk beş akçe mukâta'a'sı vardır ve birisi dahi mahrûse-i mezbûrede merhûm Ali Paşa Câmî'-i Şerîfi civarında bir bâb dükkândır hudûdu bir cânibden merhûm Ali Paşa Vakfı'na ve bir cânibden tarîk-i âmma ve bir cânibden merhûm Ali Paşa hasebeten lillâhi Te'âlâ vakf ettiği çeşmeye müntehîdir ve birisi dahi mahrûse-i merkûmede Bit Pazarı kurbunda vâki' bir bâb dükkândır ki hudûdu bir taraftan vâkıf-ı mûmâileyh hazretlerinin vakfına ve bir cânibden Defterdâr Ahmed Çelebi ibn Ali mülküne ve bir cânibi merhûm ve mağfûrunleh Sultân Bayezid Han aleyhi rahmetu ve'l-gufrân hazretlerinin vakıf ambarına ve bir tarafı tarîk-i âmma müntehî olub arsasının senevî merhûm-ı merkûm Sultân Bayezid Han Vakfı'na üç yüz altmış akçe mukâta'a'sı vardır ve birisi dahi mahal-i mezbûrda vâki' bir bâb dükkândır dükkân-ı merkûm bir cânibden vâkıf-ı mûmâileyh hazretlerinin vakfı ile bir tarafı cennet-mekân merhûm ve mağfûrunleh Sultân Bayezid Han vakfı ile ve bir cânibi merhûm ve mezkûr ve mağfûrunleh vâkıf musterahı ile bir tarafı tarîk-i âmm ile mahdûddur ve birisi dahi mahal-i mezbûrda iki tarafı merhûm ve mağfûrunleh Sultân Bayezid Han aleyhi'r-rahmetu ve'l gufran vakfı ile ve bir tarafı vâkıf-ı sâlifü'l-evsâf vakfı ile ve bir tarafı tarîk-i âmm ile mahdûd bir bâb dükkândır zikr olunan iki bâb dükkânın merhûm

ve mağfûrunleh Sultân Bayezid Han Vakfı'na senevî yedi yüz yirmi akçe mukâta'a'sı vardır ve birisi dahi mahrûse-i merkûmenin sûru ebvâbından Cibaâli Kapusu demekle meşhûr olan bâbın hâricinde vâki' olub tahtânî ve fevkânî büyü-tü müteaddideyi müştemil menzildir ki hudûdu bir taraftan bahre ve iki cânibden Yani ve Yorgi mülklerine ve bir taraftan tarîk-i âmma müntehîdir ve birisi dahi sur-ı mersûmun ebvâbından merkûm Cibaâli bâbı demekle mâlûm olan bâbın hâricinde Sivrikoz Mahallesi'nde vâki' büyü-tü müteaddideyi ve aynı câriyeyi ve kayikhâneyi hâvi menzildir ki hudûdu bir taraftan Mahmud Ağa mülküne ve bir taraftan Sivrikoz binâ ettiği mescid-i şerîfe ve bir cânibden bahre ve bir cânibden tarîk-i âmme muttasıldır menzili merkûmun arsası Ayasofya evkâfından olmağla arsasının vakf-ı mezbûre senevî otuz altı akçe mukâta'a'sı vardır ve birisi dahi sur-ı mersûmun ebvâbından Aya Kapusu demekle ma'rûf olan bâbın hâricinde vâki' fevkânî ve tahtânî büyü-tü müteaddide-i ve mahzenleri ve kenîfi müştemil menzildir ki hudûdu bir taraftan Mehmed Efendi odalarına ve bir taraftan İstanbulî Yanaki demekle meşhûr zimmî evine ve bir taraftan deryâya ve bir taraftan tarîk-i âmma muttasıldır menzili mezbûrun arsası Ayasofya evkâfından olmağla arsasının vakf-ı mezbûre senevî otuz altı akçe mukâta'a'sı vardır ve birisi dahi mahrûse-i mezbûrede At Pazarı kurbunda vâki' olub bir bâb âhûru ve dokuz bâb dükkânları ve dükkânlar üstünde olan yedi hücerâtı müştemil menzildir ki hudûdu bir cânibden Ayasofya Vakfı'na ve etrâf-ı selâsesi tarîk-i âmma müntehîdir zikr olunan ebniyenin arsası ki tûlen otuz altı zirâ' ve arzen on iki buçuk zirâ' olub senevî Ayasofya Vakfı'na sekiz yüz doksan akçe mukâta'a'sı vardır ve birisi dahi mahâl-i mezbûrede bir âhûr fevkânî yedi bâb dükkân ve dükkânların fevkinde yedi bâb hücredir hudûdu iki cânibden sâlifü'z-zikr âhûr ile dükkânlara ve iki taraftan tarîk-i âmma müntehîdir ebniye-i mezbûrenin arsası tûlen otuz altı ve arzen on beş zirâ' olub Ayasofya Evkâfı'na senevî sekiz yüz yirmi akçe mukâta'a'sı vardır ve birisi dahi mahrûse-i mezbûrede merhûm Şehzade Sultân Mehmed Han aleyhi'r-rahmetu ve'l gufran hazretlerinin câmi'-i şerîfi civarında bir bâb kasap dükkânıdır zikr olunan dükkânın hudûdu bir cânibden Ahmed Subaşı dükkânına ve bir cânibden İsmail Çavuş bozahânesine ve bir cânibden Yeniçeri Halil mülküne muttasıl olub arsasının senevî Ayasofya Vakfı'na yedi yüz yirmi akçe mukâta'a'sı vardır ve birisi dahi mahrûse-i İstanbul'da Debbağlar Mahallesi'nde vâki' Haraccı Kara Mehmed'in vakıf arsası üzerine binâ olunan fevkânî ve tahtânî otuz bâb hüceratı ve bir bâb dükkânı ve iki taşlu su ayazmasını ve kenîfi müştemil menzildir ki hudûdu bir taraftan Kazzaz Muslu odalarına ve iki taraftan tarîk-i âmma müntehîdir arsasının sal be sal vakf-ı mezbûre sekiz yüz akçe mukâta'a'sı vardır ve birisi dahi mahrûse-i İstanbul ebvâbından Unkapanı hâricinde vâki' sâbıkan Funda İskelesi iken halen Balık Pazarı olan mevzide on bâb tahtânî dükkânlardır ki hudûdu bir taraftan Süleyman Ağa

vakfına ve bir taraftan deryâya ve iki taraftan tarîk-i âmma müntehî olub arsasının senevî Ayasofya Vakfı'na yüz yirmi akçe mukâta'a'sı vardır ve birisi dahi mahâli mezbûrede dört bâb tahtânî dükkânı ve bir mahzeni ve bir bâb fevkânî gurfeyî müştemil menzildir ki hudûdu bir taraftan Süleyman Ağa Vakfı'na ve üç taraftan tarîk-i âmma müntehîdir arsasının senevî Ayasofya Vakfı'na seksen akçe mukâta'a'sı vardır ve birisi dahi mahrûse-i mezbûrede Unkapanı hâricinde bir cânibi Süleyman Ağa Vakfı'na ve bir cânibi deryâya ve bir cânibi Funda İskeleyi demekle mâruf iskeleye ve bir cânibi tarîk-i âmma muttasıl on bâb balıkçı dükkânıdır arsasının senevî Ayasofya Vakfı'na yüz yirmi akçe mukâta'a'sı vardır ve birisi dahi mahrûse-i mezbûreden İshak Paşa Mahallesi'nde vâki' hamâmdır ki bir cânibi tarîk-i âmm ve bir cânibi merhûm Sinan Paşa hanına ve iki cânibi vâkıf-ı müşârünileyh hazretlerinin menzillerine müntehîdir senevî merhûm Sinan Paşa Vakfı'na iki bin akçe mukâta'a'sı vardır ve birisi dahi mahal-i mezbûrda vâki' menzildir ki iki cânibi vâkıf-ı müşârünileyh menzillerine ve bir cânibi tarîk-i hâssa ve bir cânibi Mustafa Kethüdâ mülküne müntehîdir ve birisi dahi mahal-i mezbûre kurbunda vâki' menzildir ki bir cânibi müşârünileyh hazretlerinin vakıf sarâylarına ve bir cânibi tarîk-i hâssa ve bir cânibi şişeci odalarına ve bir cânibi Yahya Efendi Vakfı'na müntehîdir ve birisi dahi mahal-i mezbûrda vâki' menzildir ki bir cânibi yine müşârünileyh vakıf sarâylarına ve bir cânibi Abdî ve Mustafa mülklerine ve bir tarafı mescid-i şerîf ve bir tarafı tarîk-i hâssa müntehîdir ve birisi dahi mahrûse-i mezbûrda Edirne Kapusu kurbunda Çukurbostân'da binâ ettikleri tahtânî ve fevkânî otuz iki bâb müte'ehhilin odaları ve üstlerinde kırk sekiz bâb dekâkindir ki cânib-i selâsesi Çadırcı Ahmed Vakfı'na ve bir cânibi tarîk-i âmm ile mahdûddur senevî vakf-ı mezbûre sekiz yüz akçe mukâta'a'sı vardır ve birisi dahi mahmiye-i mezbûrede Kırkçeşme kurbunda Hüsam Bey'in Mahallesi'nde binâ eyledikleri dokuz bâb odalardır ki bir tarafı tarîk-i âmm ve bir tarafı muhzır Ahaveyn Ahmed Çelebi ve Sefer Çelebi mülklerine ve bir tarafı su yolu kemerlerine ve bir tarafı müşârünileyh hazretlerinin medrese-i şerîflerine müntehîdir ve birisi dahi mahâli mezbûrda vâki' bir bâb dükkândır ki bir tarafı tarîk-i âmm ve bir cânibi yine müşârünileyh vakfına ve bir cânibi Mehmed Beyin dükkânına müntehîdir ve dahi vakf-ı salifü'l evsâf tekâbellâhu minhu hezihil evkâf hazretlerinin bir mikdâr vakıfları hazret-i Ebu Eyüb el-Ensârî Aleyhi Rahmetu'l-Meliki'l-Bârîde bâkî olmuştur zikr olunan evkâfın birisi mahrûse-i merkûmenin iskeleyi kurbunda bir bâb selhânedir ki hudûdu bir taraftan hazreti Ebu Eyüb Ensârî Vakfı'ndan olub Yahya Efendi ibn [boşluk] tasarrufunda olan selhânedir bir tarafı deryâya ve bir taraftan tarîk-i âmma müntehî olub arsasının senevî Hazreti Ebu Eyüb Ensârî Vakfı'na sekiz yüz akçe mukâta'a'sı vardır ve birisi dahi mahâli merkûmede vâki' bir bâb selhânedir hudûdu bir taraftan hazreti Ebu Eyüb Ensârî Vakfı'ndan Memi bin tasarrufunda olan selhâneye ve bir

taraftan deryâya ve bir taraftan iskeleye ve bir taraftan tarîk-i âmma müntehî olup arsasının senevî hazreti Ebu Eyüb Ensârî Vakfı'na bin beş yüz kırk akçe mukâta'a'sı vardır ve birisi dahi mahâli mezbûrda debbağhânedir ki cânib-i selâsesi hazreti Ebu Eyüb Ensârî Vakfı'na ve bir cânibi tarîk-i âmma müntehîdir arsasının senevî hazreti Ebu Eyüb Ensârî aleyhi rahmetu l bari vakfına yedi yüz yirmi akçe mukâta'a'sı vardır ve birisi dahi Medîne-i hazreti Ebu Eyüb Ensârî muzâfâtından olan Kâğıthâne vadisinde vâki olup vâkıfa intimâ ile tahdîd ve tavsîften müstâğni olan karlık ve buzluk ve bir kıta' tarladır ki bir tarafı merhûm Ahmed Paşa karlığı ve bir tarafı Hamza Bey'in çiftliği ile mahdûddur Hazret-i Ebu Eyüb el-Ensârî Vakfı'na senevî iki yüz altmış akçe mukâataa'sı vardır ve dahi Medîne-i hazreti Ebu Eyüb Ensârî'de vâki' olan hadîkâdır ve birisi dahi mahrûse-i merkûmede Kiremitçi Süleyman Mahallesi'nde vâki' bir bâb etmekçi fırını ve bir bâb asiyâb-ı esbdir ki hudûdu bir taraftan tarîk-i âmma ve bir taraftan Alime(âlim) Hâtun mülküne ve bir taraftan Kasap Hüseyin evlâdı mülküne müntehîdir ve birisi dahi mahrûse-i Gedus'ta vâki' vâkıf-ı mûmâileyh ezezallâhu mevaide niamehu aleyh hazretlerinin binâ ettikleri çifte hamâm ve otuz bâb dükkân ve bir kahvehâne ve bir hân-ı kebîr ki vâkıf-ı müşârünileyh hazretlerine intimâ ile meşhûr ve ma'rûf olmağın ta'rîf ve tavsîfe ihtiyaç yoktur ve dahi vâkıf-ı âli mikdâr hazretlerinin evkâf-ı şerîflerinden birisi mahrûse-i Edirne mahallâtından Hızır Bey'in Mahallesi'nde vâki' büyü-ü müteaddideyi müştemil menzildir ve birisi dahi mahmiye-i mezbûre nevâhîsinden Çöke nâhiyesinde vâki' Kara nâm kârye kurbunda cârî nehr-i Tunca üzere dair altı göz değirmen ve üç bâb ambar ve bir bâb âhûr ve zikr olunan değirmen kurbunda vâki' bir kıta' bostânlıktır bu cümlelerin hudûdu bir taraftan mîri çayıra ve bir taraftan nehr-i mezbûra ve bir taraftan tarîk-i âmma müntehîdir ve dahi burc-ı izzetin mâh-i münîri ve evc-i rifatın mühr-i âlemgîri olan müşârünileyh ağa-yı hüccet rey-i sâhib tedbirin bir bölük evkâfı Mahrûse-i Üsküdar'da vâki' olmuştur anlardan birisi mahrûse-i mezbûrede Selman Ağa Mahallesi'nde vâki' fevkânî ve tahtânî yedi bâb odaları ve on bir bâb dükkânı müştemil menzildir ki hudûdu bir cânibden Mehmed bin Mustafa mülküne ve bir tarafı Süleyman bin Mahmud mülküne ve bir tarafı Mustafa vereseşi mülküne ve bir tarafı tarîk-i âmma müntehîdir ve birisi dahi mahrûse-i merkûmede mahalle-i mezbûrede vâki' fevkânî ve tahtânî sekiz bâb müte'ehhil odaları ve bir bâb fırın hâbbaz ve bir bâb asiyâb-ı esb ve fevkânî üç bâb odalardır hudûdu bir taraftan Ayasofya Evkâfından binâ olunan hamâma ve bir taraftan Solak Sinan Hatunu demekle ma'rûfe Hatun mülküne ve iki taraftan tarîk-i âmma muttasıldır ve birisi dahi mahrûse-i merkûmede Gülfem Mahallesi'nde vâki' tahtânî üç bâb oda ve sekiz bâb dükkân ve fevkânî beş bâb odalardır hudûdu bir taraftan Seyidi Bey mülküne ve bir taraftan el-Hâc Yusuf dükkânıyla Mehmed ibn Ahmed asiyâbına ve iki tarafı tarîk-i âmma müntehîdir ve birisi dahi mahrûse-i mezbûrda Hâce Hâtun

Mahallesi'nde dört bâb fevkânî odayı ve iki bâb tahtânî odayı ve iki sofayı ve bi'r-i mâyı ve kenîfi müştemil menzildir hudûdu bir taraftan Resûl bin Mustafa mülküne ve bir taraftan tarîk-i hâssa ve iki taraftan tarîk-i âmma müntehîdir ve birisi dahi mahrûse-i mezbûrda Zeynel Mahallesi'nde iki bâb dükkândır hudûdu bir taraftan Selamsız Muslu mülküne ve bir taraftan tarîk-i âmma ve bir taraftan mescide muttasıldır ve birisi dahi mahrûse-i mezbûre tevâbii'nden Papas Bahçesi demekle ma'rûftur hudûdu bir cânibden mîri Kulle bahçesine ve bir cânibden mîri Kandil bahçesine ve bir cânibden deryâya ve bir cânibden vadiye müntehîdir ve birisi dahi mahrûse-i merkûmede Mehmed Paşa Mahallesi'nde leb-i deryâda kayikhânedir ki fevkânî üç bâb odayı ve tahtânî dört kayık çekçek mevzii müştemil olub hudûdu bir cânibden merhûm Rüstem Paşa İskelesi'ne ve bir cânibden deryâya ve bir cânibden Turhan bin Abdullah Vakfi'na ve bir cânibden tarîk-i âmma müntehîdir ve birisi dahi mahrûse-i mezbûrede Selman Ağa Mahallesi'nde vâki' fırındır ki bir dükkânı ve bir bâb asiyâb-ı esbi ve fevkânî iki bâb odayı müştemil olub hudûdu bir taraftan merhûm Selman Ağa Vakfi'na ve bir cânibden Hamza Fakih Vakfi'na ve cânib-i aherden Mehmed Paşa Vakfi'na ve bir taraftan tarîk-i âmma muttasıldır ve birisi dahi mahalle-i merkûmede bir bâb bezirhâne ve şiruğanhâne ve iki bâb dükkân ve fevkânî bir büyük odayı müştemil olub hudûdu bir cânibden Cebeciâşı Vakfi'na ve bir cânibden Ali Reis ibn Abdullah ile Cafer bin Alagöz mülklerine ve bir taraftan tarîk-i âmma muttasıldır ve birisi dahi Mahrûse-i Üsküdar tevâbiinden Kârye-i Kadı civârında merhûm İbrahim Ağa zâviyesi kurbunda iki kıta' otuz dönüm bağdır ki bir kıta'sının hudûdu bir taraftan zâviye ve bir cânibden Câbî Hüseyin bin Bayezid tasarrufunda olan bostâna ve bir cânibden tarîk-i âmme müntehîdir ve bir kıta'sının hudûdu iki taraftan tarîk-i âmma ve tarafeynden fahrü'l-müderrişîn Mehmed Efendi ibn Muhiddin bağına müntehîdir zikr olunan bağın arsası merhûm İbrahim Ağa Vakfi'ndan olub vakf-ı merkûma senevî üç yüz altmış akçe mukâta'a'sı vardır ve birisi dahi Galata kazâsına tâbi' Kuruçeşme demekle şöret ve ünvan bulan mevzii'de leb-i deryâda vâki' hadîka-i enikâdir hadîka-i merkûme hâricî ve dâhili büyütlü müteaddide-i ve hamâmı ve mâ-i câriyi ve kusuru ve kurumu müştemil olub hudûdu bir cânibden Yasef veledi nâm Yahudi mülküne ve bir cânibden Musi veledi nâm Yahudi mülküne ve bir cânibden deryâya ve bir cânibden vadiye müntehî olur ve dahi ber muktezâ-yı emr-i celilu kadr "*ahsin kemâ ahsenâllâhu ileyke*" avâtıf-ı aliye-i Sultâni ve mevâhib-i seniyye-i hâkânî kâffeten ve cümle-i has ve amme şâmil olub husûsen güzide-i havâss-ı sa'âdet ihtisâsları hakkında bi dirîğ ve kâmil olmağın râfi'î nikin saltanat-ı ins ü can ve mühr-i ayn hilafet-i âlem ve âlemiyân-ı han imâmet-i uzmâ varis-i hilafet-i kübrâ mazhar-ı âyat ma'delet-i zahîre râfi'î âyât-ı nısfet-i bâhire merhûm ve mağfur el vâsilu ilâ rahmeti'l-Meliki'l Gafur es-Sultân ibn Sultân es-Sultân Murâd Han eskenehullâhu

Te'âlâ fi a'la gurafî'l- câvidan hazretleri vâkıf-ı celilü's-şân hazretlerine vilâyet-i Rumeli'nde Selanik kazâsında ledel cîrân Kesendire adası demekle şöhret ve ünvan bulan adayı mülknâme-i hümayûnda şerh ü beyân olunduğu üzere hibe ve temlik ve mülknâme-i hümayûn sadaka ve ihsân buyurmuşlardır zikr olunan adanın hudûdu bir taraftan yine kazâ-i mezbûrdan Ayamamağa nâm kâryeye muntehî olup vesâ'ir etrâfını deryâ ihâta eylemiştir ve bad bu kitâb-ı anber-i bâr ve güher-i nîsârın gülberk-i sahâifi üzere şebnem zikri münteşir ve tâbak-ı varak pür letâifi üzere leâli-i ismi münteşir olup taht-ı bahs mülklerinde dâhil olan kâffe-i müstagallât ve müsakkafâtı ve amme-i imârât ve akârât-ı hudûdunda dâhil cemi-i ebniyesi ve edevât, âlâtı ile ve cümle hukûk ve terâik ve merâfıkı ve tevâbi' ve levâhıkı ile tarîk-i şer'i ve üslûb-ı merî ile silk-i mülk-i sahîhlerine dâhil ve hakk-ı kuhh-ı sarîhleri sımtında hâsıl olduktan sonra kâffe-i tasarrufat-ı şer'iyesinin cevâzı ve amme-i teberruât-ı merîyelerinin nifâzı hâlinde vakf-ı sahîh-i şer'i ve habs-i sarîh-i merî ile vakf ve habs ve tesbîl edüp hazret-i vâkıf hatir-i hayr-ı habîr lâ-zâlet umûri'l-cumhûr-i menûtaten bi-reyihî'l-münîr hâlâ şöyle rey-i ve tedbîr eyleyip şart eyledi ki cümle-i evkâf-ı mestûre ve cemi-i ecnâs-ı mesfûresinin tertîb ve mühimmâtı ve nazm-ı müsellemtâı için bir müdebbir ve âkıl-ı hırdâmend ve kâmil emrinde mücidd-i reyinde müstevid subh-ı rûşen gibi sıdkla meşhûr serv ü çimen gibi istikâmetle mezkûr envâr-ı sâye-i hilâl-i rûşen gibi günden güne ber kemâl ve âsar hadd-i nihâl-i gülşen gibi dem be dem istikmâl üzere bir mütevellî nasb olunup hizmet-i ma'lûmesini edâ ettikten sonra yevmî otuz akçeye mutasarrıf ola ve dahi hesaba kıtabe kâdir üslûb-ı rakam ve siyâkatta mâhir istikâmette kalem gibi âlem emsâli içre makbûl ve müsellemtâ bir kâtib nasb olunup ba'de edâi'l hizme yevmî sekiz akçeye mutasarrıf ola ve dahi iffet ile mevsûm istikâmet ile ma'lûm işe güce yarar maslahat-güzar iki kimesne câbî olup birisi mahrûse-i İstanbul'da olan evkâfın hizmetini kemâ yenbağı edâ ettikten sonra yevmî beş akçeye mutasarrıf ola ve birisi dahi Üsküdar'da olan evkâfa câbî olup hizmet-i ma'hûdesini edâ ettikten sonra yevmî üç akçeye mutasarrıf ola ve dahi vilâyet-i Rumeli'nde vâki' evkâf-ı sâlifetü'l evsâflarına bir câbî-i sâhib-i insâf nasb olunub istikâmet ve diyânet ve salâh ve emânet ile kemâ yenbağı hizmet-i cibâyet edâ olunduktan sonra yevmî on akçe vazîfeye mutasarrıf ola ve bir hizmetine kâdir emekdâr mütemen bir er kimesne câbî-i süvar olup hizmet-i ma'rûfesini edâ ettikten sonra yevmî yedi akçe vazîfeye mutasarrıf ola ve dahi şart ettiler ki murg-ı rûh-ı pür fütûhları âşiyâne-i sidre ve tûbada makârr ve â'lâ-yı iliyye seyr ü sefer edüp bu dâr-ı fenâdan dâr-ı bekâyâ intikâl ve neşimet-i fâniden serây-ı bâkîyeye irtihâl edüp cenâb-ı rabbü'l-enâm cânibinden “*vallâhu yedu ilâ dari's-selam*” davetine icâbet ettikte hemşirelerinin zevci olan kıdvetü'l-emâcid ve'l eâli câmiu'l-mehâmid ve'l-meâli menbâ-i mehâsin ve kerem ve maden-i marazı-i şiyem sâhib-i kadri ref'î ve sâhib-i ezyâl-i câh-ı meni-i

nücûm-i zahîre meârif ile sipehr-i câh ve celâl-i fûnûn bâhire-i kemâlât ile dibâce-i kitâb-ı kemâl-ı ayine-i maksûd nemâ-yı erbâb-ı meârib-i mirât-ı safâ efzâ-yı ashâb-ı metâlib olan tâlib-i rızâ-yı rahmet sümmiye esedullâhil Melikü'l Mennan Ali Ağa hazretleri evkâf-ı mezbûretü'l-evsâflarına nâzır olub ayn-ı inâyet ile hakk-ı nezâret edâ ettikte yevmî on akçe vazîfeye mutasarrıf ola ba'dehu esâtîn-i selâtîn-i âl-i Osman meddallâhu silsiletehum ıla ahiri'z-zamân hazretlerinin sarây-ı behişt-i nişânlarında her asır ve her zamânda ağa-yı rûşen-i rey-i ve kamiran olan sâhibü'l-izzî ve't-temkîn kıdvetü'l-havâss ve'l-mukârrebîn kapu ağası hazretleri evkâf-ı şerîflerine nâzır olub ayn-ı inâyet ile hakk-ı nezâreti edâ ettikten sonra yevmî on akçe vazîfe-i nazîfeye mutasarrıf olalar ve müşârünileyh ağa-yı alişân vâkıf-ı kerdan hazretleri şart ettiler ki bu sifr-i celilü's-şân içre kalîl ve kesîr takrîr ve tahrîr olunan ecnâs-ı ahbâs ve esnâf-ı evkâf-ı sâlifü'l-evsâf mütevellî ve kâtib ve câbî mübâşeretleri ile sal be sal vech-i şer'i ve helâl üzre istiğlâl olunup ba'de zâlik hazreti Kerîm-i hallâk vâhibü'l-erzâk celle celâluhu ve amme nevâlihu rey ve gılâl ve ribh ü helâlden her ne ihsân ederse hâsıl olan maldan mukâtaât edâ olduktan sonra mesâlih-i meremmet ve ta'mîr-i cümleden takdîm olunup harc-ı yesir bilâ-tevakkuf ve te'hîr itmâm olunup harc-ı külli lâzım olacak mübaşîrîn-i vûlat-ı vilâyete mürâcaât ve bu husûsta kemâl-i mertebe müsara'at edip meremmâta muhtaç olan yerleri tahmîn-i sahîh ile tahmîn ettikten sonra husûs-u mezbûre mübaşîr bir emin-i mu'temed nasb olunub cümle nâzır-ı mûmâileyh rey-i şerîfleri ile lâzım olan merammâtı tehîr ve tesvîf etmeyüb itlâf ve isrâftan hazer ve hatt-ı itidâl ve insâftan gezer etmeyeler ve dahi vilâyet-i Anadolu'da Gedus nâm kasabada binâ ettikleri câmi'-i mesfûr ve mabed-i pür nûrlarına şart ettiler ki bir hoş elhân-ı reşk-i andelib-i cenân zâhid-i tâki âbid muttaki münîr-i fesâhatta bülend-i pâyeye ve mihrâb belâgatta pişuvâ-yı vâcibi'r-r'iaya hatîb edib nasb olunup eyyâm-ı Cum'a ve âyatta a'le'l- vechi'l-mesnûn el mu'tâd hitâbet edüp yevmî sekiz akçeye mutasarrıf ola ve dahi sâlih ve deyyin ve râi ve mütedeyyin ehl-i Kur'an lezîz-i elhân makbûl-i has ve amm muktedâ-yı enâm bir imâm nasb olunup salavât-ı hams-i mektûbe ve cemâ'at ile edâ olunan sâ'ir salavât-ı mergûbede cemâ'at-i müslimîn ve zümre-i muvahhidîne imâmet eyleyüb yevmî sekiz akçeye mutasarrıf ola ve dahi imâm-ı mezbûr ba'de's-salât el-fecir sûresini cehriyle tilâvet edüp kezâlik ba'de salât-ı zuhur sûre-i vâkı'a tilâvet edüp ve ba'de salâti'l-asır sûre-i amme tilâvet edüp ve ba'de salâti'l-işâ' sûre-i tebâreke tilâvet edüp yevmî dört akçeye mutasarrıf ola ve dahi üç nefer yegâne-i rüzgâr ve ferzâne-i edvâr fenlerinde mâhir nağmelerinde sâhir makbûl-ı enâm büzürg ve küçük içre hüccet-i nâm mü'ezzinler nasb olunup zikr olunan mü'ezzinlerin ikisi asıl olub hergün evkât-ı hamsede ol risk-i behişt-i âlâ ve cennet-i me'va olan câmi'-i safâ bahş ve dilgüşânın minâre-i bülend-i sidre manendine münâvebe ile çıkıp bilâ-lahl ve lâ-tercî' ezân okuyup şîare-i din-i bülend âvâze ve seniyye-i

künye-i ehl-i yakını dem be dem nâze kılalar ve birisi salâ mü'ezzini olub Cum'a ve bayram eyyâmında a'le'l-vechi'l-ma'rûf beyne'l- enâm salâ ve nidâ edüp asılların birisi reisi olub ana yevmî altı akçe vazîfe verile ve birisine dahi yevmî beş akçe vazîfe verile salâ mü'ezzine yevmî bir akçe verile ve dahi bir ehl-i dil kimesne muarrif olub hizmet-i ma'rûfesini edâ ettikten sonra yevmî iki akçe vazîfeye mutasarrıf ola ve dahi şart ettiler ki derûnun güzideleri ve hizbinin pesendîdeleri beş nefer kimesne her Cum'a gün kâble salât-i Cum'a mahfel-i refi-u câmiü'l muhsenâta cem' olub her biri savt-ı hüsn ile birer aşr-ı şerîf tilâvet edüp yevmî ikişer akçeye mutasarrıf olalar ve içlerinden biri âlem ve ekmel-i ser mahfel olub yevmî dört akçeye mutasarrıf ola ve şart ettiler ki hatîb-i câmi'-i şerîf hâfız-ı kelâm-ı latîf olursa ser mahfel-i evvel ola ve dahi Kur'an-ı Azim ve Furkan-ı Kerîmin celâlet şânını fehim eder on nefer ehl-i Kur'an mücevvid ve fasihü'l-lisân kimesneler her gün ba'de salât-ı fecr câmi'-i mezkûr refi'il- kâdirde süreyyâ sıfât-ı cem'iyet ile birer cüz-i şerîf tilâvet edüp sevâbını vâkıf-ı müşârünileyhe hibe ve ihdâ edüp yevmî ikişer akçeye mutasarrıf olalar ve müteşerri ve kâni müteverri ve gayri tâmi' bir âlim ve âmil ve takiyy ve kâmil ve fâzıl-ı nâkî Câmi'-i şerîfte ba'de sâlâti'l Cum'a kâffe-i müslimîn ve amme-i muvahhidîne vaaz ve nasihat edüp yevmî otuz akçe vazîfeye mutasarrıf ola ve bir ehl-i Kur'an fasihü'l-lisân kimesne câmi'-i şerîfte ba'de salâti'l-mağrib bir aşr-ı şerîf tilâvet edüp yevmî iki akçeye mutasarrıf ola ve dahi sülehâyı müslimînden bir recül-i emin noktai ta'yîn olunup erbâb-ı vezâiften birisi zimmetine lâzım olan hizmeti edâ etmekte ihmal ve hizmet-i muâyenesini ikametde ihlâl ederse nokta vaz' edüp kâbil olursa hizmetini bir kimesneye itmâm ettürüp ve her re's-i şehirde mütevellîye i'lâm eyleye ki bilâ özr ü şer'i terk ettüğü hizmetinin vazîfesi had olunup eğer tenbîh ile mütenebbih olmayup iksâr-ı ihlâl edüp dâima kesel ve ihmal üzere olursa azl olunup yerine bir müstehak hizmetinde mucidd uhdesine lâzım olan hizmetten tefriğ zimmetinde müctehid bir kimesne nasb oluna mezbûr noktaiye hizmeti mukâbelesinde yevmî iki akçe verile ve dahi hazret-i vâkıf mastur nevverallâhu kanadile hayrahu ila nefhâti's-sûr şart ettiler ki iki sâlih nurâni kimesne mûmâileyh câmi'i adîmi's-sâni içre sirâcî olub câmi'-i mezbûrun şem'leri ve kandilleri hizmetin görüp gözedüp vaktinde yakup deminde söndürüp birisi yevmî üç akçe ve birisi yevmî iki akçe vazîfeye mutasarrıf ola ve dahi hizmetinde mucidd u kâin tâhirü'z-zeyl iki kayyım nasb olunup hizmet-i lâzimesini edâ ettikten sonra yevmî üçer akçe vazîfeye mutasarrıf olalar ve dahi hizmetinde pak sâba gibi cüst ve çâlâk bir kimesne ferrâş olub hizmetinde ihmal etmeyüb yevmî iki akçe vazîfeye mutasarrıf ola ve dahi hazret-i vâkıf aliyyü'l-şân eskenehullâhu Te'âlâ fi a'la gurefi'l-cinân şöyle şart ve beyân ettiler ki medrese-i şerîfe-i sâlifetü'l-ünvânlarına keşşâf-ı müşkilât hallâl-i mu'dalât merziyü's-şemâil mer'iyü'l-hasâil bedâyi u beyân ile dekâyik-i meâniye ârif ve zerâye-i burhân ile hakâyık-ı mesâniye

vâkıf ebnâ-i zamân içinde mümtâz ve akrânı beyinde serâmed ve serafraz bâb ifadede hasbelâde bezl-i cuhd eder bir müderris nasb olub eyyâm-ı ta'tilden gayr-i evkâtta bilâ-tevakkuf ve tehir ulûm-ı fâikadan ve fûnûn-ı râikadan talebe ve müstaidîne ifâde edüp yevmî elli akçe vazîfe-i nazifeye mutasarrıf ola ve zümre-i müstefidîn ve fırka-i müstaidînden on altı nefer kimesne hücerât-ı medresede sâkin olub yevmî beşer akçeye mutasarrıf olalar ve içlerinde selâmet-i tâb' ile mevsûf ve istikâmeti idrak ile ma'rûf biri muid nasb olunup medrese-i merkûmede muid için ta'yîn olunan iki hücrede sâkin olub hizmet-i iâdeyi a'la mâ cerat bihilade edâ ettikten sonra yevmî on akçe vazîfeye mutasarrıf ola ve zikr olunan talebe-i aliyetü'l-mertebeden her birisi ba'de salâti'l-fecr dershânedede cem' olub Kur'an-ı Azim ve Furkan-ı Kerîmden birer cüz-i şerîf tilâvet edüp sevâbını vâkıf-ı mûmâileyhe esbağallâhu Te'âlâ niâme rızâen aleyh hazretlerine hibe edüp yevmî ikişer akçeye mutasarrıf olalar ve birisi dahi medrese-i merkûmede bir bevvâb nasb olunup feth u iğlak-ı bâbda ihmal etmeyüb yevmî dört akçeye mutasarrıf ola ve bir hizmetinde kâdir ihmal ve keselden âri uhdesine lâzım olan emirden tefri zimmetinde sâi bir kimesne medrese-i merkûmede ferrâş olub ba'de edâi'l-hizmet yevmî üç akçeye mutasarrıf ola ve dahi vâkıf-ı mûmâileyh hazretleri şart ettiler ki Eğri Kapu hâricinde olan mescid-i şerîfe imâmete salih bir kimesne imâm nasb olunup yevmî beş akçeye mutasarrıf ola ve ba'de salâti's-subh cehir ile sûre-i Yasin-i şerîf tilâvet edüp yevmî iki akçeye mutasarrıf ola ve bir sâlih kimesne dahi mü'ezzin nasb olunup yevmî üç akçeye mutasarrıf ola ve ba'de salâti'l-işâ' cehir ile sûre-i tebâreke tilâvet edüp yevmî iki akçeye mutasarrıf ola ve bir hizmete kâdir kimesne dahi kayyum ve ferrâş nasb olunup yevmî dört akçeye mutasarrıf ola ve her sene mihrâbın iki tarafına iki vukiyye gelir iki dâne şem'i asel alınup ikâd oluna ve şem'i rugan ile rugan-ı zeyt için yevmî beş akçe sarf oluna ve her sene hasırına ve sâ'ir mefrûşâtına ve gayri levâzımına bin akçe sarf oluna eğer ihtiyaç olmazsa vakıf için hıfz oluna ve mescid-i mezbûr kurbunda vâki' sebil-i bî adîle iki nefer kimesne ta'yîn olunup birisi hizmet tesbilde sâi cemil edüp yevmî üç akçeye mutasarrıf ola ve birisi dahi sikâyeye kifâyet mikdârı su çekip yevmî iki akçeye mutasarrıf ola ve dahi şart ettiler ki sarây-ı hassada olan teberdârların akra' olanlarından on beş nefer kimesne ta'yîn olunup her birisi günde birer sûre-i Yasin-i şerîf tilâvet edüp yevmî ikişer akçeye mutasarrıf olalar ve baltacılar kethüdâsı ve bölük başısı her kim olursa vech-i meşrûh üzere tâife-i merkûmeye edâ-i hizmet ettürüp kethüdâ yevmî iki akçeye mutasarrıf olub bölük başı yevmî bir akçeye mutasarrıf ola ve dahi vâkıf-ı sâhib'ül avâtıfı'l-mevsûf bi-esnâf-ı evsâfi'ş-şerâif hafazzallâhu zâtehü'ş-şerîf anin nevâibi şöyle şart edüp buyurdular ki “*ya eyyühen nefsi'l-mutmainne ircii ilâ râbbiki râziyeten merziye*” nidâsına icâbet “*ve udhulî cennetî*” emrine itâat eylediklerinde menâzil-i rûhâniyede rûh-ı pür fütûhları istimâ-i kelâm-ı Melîk-i allam ile

muattar ve revâhil-i rûhâniyede sadr-ı meşrûhları istişmâm-ı Kur'an-ı Azim ile mu'teber olmak için hücre-i şerîfenin dâima bâb-ı refie bî nâzır dâin-i muhlisîn ve zâirîn-i müminîn ve kurra-i eczâ-yı şerîfe ve huffâz-ı türbe-i münîfe için meftûh ve mekşûf olmağa mezâr-ı pür envâr ve manzar-ı perverdigârda iki emin ve dindâr ve mümin sâhib-i vakâr salâh ve zühdü âşikâr kimesneler türbedâr olub hıfz ve hirâsette kemâyenbağı ikdam ve uhdelerine lâzım olan hizmette ihtimâm ederlerse yevmî dörder akçeye mutasarrıf olalar ve sekiz adet kârî ve cârî ve ayb ve fesâddan cârî ehl-i sâlât ve salâh ve sâhib-i reşad ve felâh diyânet ve emânet ile mevsûf ve hirâset ve siyânet ile ma'rûf kimesneler bekçi olub münâvebe ile Kur'an-ı Azim ve tilâvet-i furkân-ı alîm meşgûl olalar bir vechle ki gece ve gündüzün saatından bir saatta türbe-i cennet misal ve ravza-i ve rahmed menalda kırâ'aten hâli olmayalar bu vecihle müdâvemet ve muvâzabet ettiklerinde yevmî üçer akçeye mutasarrıf olalar ve dahi hazret-i vâkıf alıyyü'ş-şân la zâlet fevâzilihu asileten ilâ külli kâsın ve dânin şöyle şart eylediler ki altmış nefer kimesne cüzhân olub âdet-i mersûm ve kâide-i ma'lûme üzre ba'de salât-ı subh otuz neferi ve ba'de salâti'l-asr otuz neferi her gün türbe-i şerîfede cem' olub her biri debu vakâr ve tecvîd ve tertîl ve cihar ile vechi mushaf-ı şerîfe nâzır ve lahni celi ve hafî ve tashîf ve tahrîften hâzır oldukları halde Kur'an-ı Azim ve Furkan-ı Kerîmden birer cüz-ü şerîf tilâvet eyleyüb ba'de's-salâti subhda olan hatmin sevâbın hazret-i hâbib-i ekrem şefî'i ümem sallallâhu Te'âlâ aleyhi vesellem hazretlerinin rûh-ı pür akdeslerine hediye edeler ve ba'de salâti'l-asırda olan hatmin sevâbın vâkıf hazretlerinin rûhuna ihdâ edeler ve her mecliste takdîme-i lâyıq ve akrânından fâik akra ve âlem ve zühd ve râ'da müsellemler olanları reisleri olub âdet-i ma'mûle ve sünnet-i makbûle muktezâsınca iftitâh kırâ'atı nâm hüdâ-yı Melîk-i allem ile iş'âr ve ihtitâm tilâvet-i sûre-i İhlâs ve muavvizeteyn ve Fâtihâ ve evvelü'z-zehrâveyn ile izhâr edüp yevmî üçer akçeye mutasarrıf olalar ve yirmi dokuz nefer kurra yevmî ikişer akçeye mutasarrıf olalar ve her mahfelde cihet-i ta'rîfe kâbil ve tefrîk ve cem-i eczâ hizmetine kâil bir kimesne ibtidâ-i kırâ'atte eczâ ve intihâ münşi-i medh u senâ olub ba'de't-tefrîk ve'l cem' resûl-i güzîn mahbûb-ı rabbi'l-âlemîn server-i dü cihân ve mefhâr u ins ü cân bülbül-i gülistân nübüvvet-i serv-i bostân risâlet der asûmân-ı vefâ gühergân-ı safâ hazret-i Muhammed Mustafa sallallâhu aleyhi vesellemin rûh-ı musaffa ve âli i'zâmın ve ashâb-ı kirâmın ervâh-ı pür sefâları ve hazreti vâkıf-ı vafirü'l-ihsânın rifât-ı derecâtı ve geçmişlerinin mezid-i mağfireti için duâ ettirmekte ihtimâm edüp yevmî bir akçeye mutasarrıf ola ve hakkaniyet ile ma'rûf ve bî garazlık ile mevsûf bir kimesne türbe-i mezbûre ve ravza-i ma'mûrede olan eczahânân ve bekçiyân ve sâ'ir hüddam için noktacı olub bir kimesne hizmette ihmal ettürmeyüb yevmî iki akçeye mutasarrıf ola ve dahi şart ettiler ki zühhad-i ubbâddan sâlih ve mütedeyyin ve reşâdi zâhir ve metin sünniyü'l- itikad ve hânefiyü'l mezhep kimesne musalli olub her gün salât-ı

nâfile caiz olduđu zamânda hazreti vâkıfın fevt olan namâzının tedâriki için yirmi rekât nâfile namâz kılıp dua eyleye yevmî altı akçeye mutasarrıf ola ve dahi şart ettilerki medrese-i şerîfelerinde müderris ve talebe için vakf ve ta'yîn eyledikleri kütüb-i mu'tebereye emânet ve diyânet ile ma'rûf ve sadâkat ve istikâmet ile mevsûf bir kimesne hâfız-ı kütüb nasb olunup edâ-i hizmet ettikten sonra yevmî sekiz akçeye mutasarrıf ola ve bir recûl tâhir ve ârif ve ahvâl-ı buhrda mâhir ve vâkıf-ı emânet ve diyânetle ma'rûf ve tayyib-i hâl ile mevsûf kimesne türbe-i şerîfte buhûrî olub mecâlis-i kırâ'at-ı Kur'an ve evkât-ı şerîfe-i latîfede a'la vechi'l-mu'tâd buhûru itfâ ve ikâdda müdâvemet edüb yevmî üç akçe vazîfeye mutasarrıf ola ve bir zarif nazif-i ten ve sübk-i rûh hafif-i beden kimesne destâr-bend olub yevmî üç akçe vazîfeye mutasarrıf ola ve dahi şart ettiler ki müstakim ve hizmete kâdir ve mu'temedlikte nazir-i nâdir iki nefer kimesne mu'temedler olub birisi İstanbul'da ve Üsküdar'da ve Ebu Eyyüb el Ensârîde olan mu'temed olub yevmî yedi akçeye mutasarrıf ola ve birisi dahi İstanbul ile Silivri beyninde olan kaldırımı görüp gözetüp muhtaç olan yerlerini bilâ-tehîr meremmet eyleyüb yevmî beş akçe vazîfeye mutasarrıf ola ve dahi şart eylediler ki bir recûl-i emin ve gars-ı eşcârda mâhir ve hıfz ve hirâsette nazir-i nâdir kimesne mahmiye-i Üsküdar'da vâki' Kadıköy demekle ma'rûf köyde vâki' olan bağda bağbân olub bi-hasebi'l mevâsim bağbana lâzım olan hizmeti bî-kusur edâ edüp yevmî iki akçeye mutasarrıf ola ve dahi vâkıf-ı mûmâileyh esbeğallâhu Te'âlâ mevâide niamehu aleyh hazretleri şart ettiler ki kasâba-i Gedus'de hasbeten lilahi'l Melîki'l-kuddüs binâ ettikleri câmi'-i şerîf adîmü's-şâni içre bir âlim ve âmil şeyh-i fâzıl u'lûm-ı arâbiye ve fûnûn-ı edebîyede kâmil ki mütevâtir vakkad ve meşhûr şâdî arif ve mahfî ve müdgâm ve murakkık ve mufahhım beynini fârik ihtilâs ve itmâm ve revm-i işmâm ortasında mümeyyiz-i kırâ'at-ı âşar beyânında tasnîf olunan kütüb-i mu'tebere ifâdesine kâdir mehâric-i sıfât-ı hurûf ri'âyetinde mâhir kimesne şeyh olub kırâ'at-ı âşar ta'lîm edüp ilm-i kırâ'ati ihyâ ve neşr edüp imâm-ı hümâm Ebu Muhammed el Kâsım eş-Şâtıbi Kasîdesini ve dahi İmâm Câberi'nin Kasîde-i merkûme şerhini tâlibine ta'lîm edüp yevmî on altı akçe vazîfeye mutasarrıf ola ve sekiz nefer talebesine dahi birer akçe verilip yevmî sekiz akçe vazîfeye mutasarrıf olalar ve dahi vâkıf u aliyü's-şân eskenehullâhu Te'âlâ fi a'la gurafî'l-cinân hazretleri câmi'-i şerîf-i âli-i bünyânları kurbunda vâki' mektep-i dilistânlarına şart ettilerki edib-i lebib üstâd-ı mehib-i emin ve dindâr afîf ve sâhib-i vakâr ehl-i Kur'an bir mu'allim- i celilü's-şân nasb olunup ta'lîm-i sıbyan-ı müslimîn ve telkîn-i kitâb-ı mübin edüp cihet-i ta'lîm için yevmî altı akçeye mutasarrıf ola ve dahi şart ettiler ki bir ehl-i Kur'an mücevvid ve fâsîhü'l-lisân sîmâsında âsâr-ı salâh zâhir ve alnında nûr-ı felâh necm-i bâhir gibi zâhir bir kimesne halîfe olub hizmet-i lâzîmesini edâ ettikten sonra yevmî dört akçe vazîfeye mutasarrıf ola ve dahi vâkıf-ı salifü'l-evsâf tekâbellâhu minhu hazîhi'l-evkâf şart

ettiler ki sanatında mâhir işe güce kâdir bir neccar meremmata tâyin olunup zikr olunan müsakkafat ve akâratın lâzım olan meremmatını bilâ tevakkuf ve te'hir binâ ve tamir edip yevmî üç akçe vazîfeye mutasarrıf ola ve dahi vâkıf-ı mûmâileyh efazallâhu sicale feyzihi aleyh hazretleri şart ettiler ki sebil bî-âdillerine kemâl-i tahâret ve nihâyet-i nezâfet üzere hareket eder dört nefer kimesne sâkî olub hergün ikisi hizmet-i tesbilde say ü cemil edüp yevmî dörder akçe vazîfeye mutasarrıf olalar ve dahi sikâye-i merkûme için iki nefer hizmetinde mücidd ü sâi kimesneler sâkî ta'yîn olunup her gün hafır olunan mâi câri bi'rinden sikâye kifâyet mikdârı su çekip yevmî dörder akçe vazîfeye mutasarrıf ola ve şart ettiler ki kasâba-i Gedus'da hasbeten lillâhi'l-Te'âlâ icrâ ettikleri çeşmelere ve şadırvan suyu yoluna bir kimesne su yolcu olub yevmî iki akçe vazîfeye mutasarrıf ola ve dahi şart ettiler ki hulûs-ı niyet ve huzûr-ı taviyet ile Medîne-i Münevvere âlâ sâkiniha efzâlu's-sâlât ve't-tahiyyede binâ buyurdıkları Câmî'-i şerîf-i seâdet irtisâma bir hoş-ı elhân reşk-i andelib-i cinâne bir hatîb-i edib nasb olunup hizmet-i hitâbeti kemâyenbağı edâ ettikten sonra her sene surre ile on beş flori irsal oluna ve dahi ehl-i Kur'an lezîz-i elhân makbûl-i has ve amm muktedâ-i enâm olmağa lâyük bir kimesne imâm nasb olunup her sene on beş flori irsâl oluna ve üç nefer yegâne-i rüzgâr ve ferzâne-i edvâr mü'ezzinler nasb olunup ikisi asıl olub her senede on beş flori irsâl oluna ve biri salâ mü'ezzini olub her senede on flori irsâl oluna ve bir kimesne dahi muarriif olub hizmet-i tarif-i edâ ettikten sonra her sene on flori irsal oluna ve dahi beş nefer hâfız-ı kelâm-ı kadîm ve kâri-i Kur'an-ı Azim kimesneler câmi'-i mezbûrun mahfel-i şerîfnde devir-hânlar olub Cum'a günlerinde kable's-salât adet-i kadîme-i müstakirre ve kâide-i mukarrara-yı müstemirre üzere tertib ve tertîl ile Kur'an-ı Azimden an zahri'l-kalb savt-ı hüsn ile birer aşr-ı şerîf tilâvet edeler ve bunların ilm-i Kur'anda mukdem ve müsellemleri ve tecvîd ve tertîlde efzâl ve âlemleri ser mahfel olub devr-i evvel ibtidâ edüp ve yine ol itmâm ede ve her senede on flori irsal oluna ve bâkî huffâza her senede kırk flori irsâl oluna ve ser mahfellik hatîbe meşrût ola ve iki nefer mümin ve müttakî ve sâlih ve hizmetine kâdir ve istihdâme kâbil kimesneler çerâği olub câmi'-i mezbûrun çerâğlarını ve kandillerini vakti ile yakup ve vakti ile deylendirip ve hacet oldukça kandillerini indürüp silip süpürüp pâk edüp ve yağ koyup yine yerine asalar ve her senede on flori irsal oluna ve fitil baha ve kanadil silmek için kirbas baha her senede dört flori irsal oluna ve iki nefer emin ve mütedeyyin ve emânet ve diyâneti metin kimesneler kayyum nasb olunup her birine senede on beşer flori irsal oluna ve bir kimesne dahi ferrâş ta'yîn olunup her senede on flori irsâl oluna ve dahi şart ettiler ki Mekke-i Mükerreme şerreffeallâhu Te'âlâda râfi'i âlâm-ı dîn-i İslâm ve dâfi'-i zâlâm-ı dâim-i izlâm olan fâtih-i Medîne-i beytül haram ve kasîr-i esnâf-ı esnâm hâtîme-i silsile-i enbiyâ ve vâsitâ-i râbitâ-i kılâde-i asfiyâ dürr-i yek dâme-i bahr-i cûd ve şem'i şebistân cem'i ehl-i

şuhûd ve sâhib-i livâ-i ma'kûd ve sâkî-i havz-ı mevrûd seyyidü'l-enbiyâ ve efzâl-i nevi'l-beşer ve ekmel-i ehlü'l-medâr ve ber hazret-i hâbib-i ekrem sallâlahu aleyhi vesellem hazretlerinin mevlid-i şerîfleri olan makam-ı mutahhar ve mabed-i muattarda salih ve deyyin [ve] verâ ve mütedeyyin ehl-i Kur'an lezîz-i elhân makbûl-ı has ve amm muktedâ-i enâm bir kimesne imâm nasb olunup salât-ı hams-ı mektûbe ve cemâ'atla edâ olunan sâ'ir salât-ı merkûbede cemâ'at-ı müslimîn ve zümre-i muvahhidîne imâmet eyleyüb her senede yirmi flori irsâl oluna ve bir kimesne dahi sirâcî ve ferrâş ta'yîn olunup kemâyenbağı edâ-i hizmet ettikten sonra her senede on flori irsâl oluna ve rujan-ı zeyt ve fitil-i bahâ ve kanâdîl-i bahâ için her senede on beş flori irsal oluna ve dahi şart ettiler ki Mekke-i Mükerrreme ve Medîne-i Münevvere'de mütekâid olanlardan salâh ve diyânetle ma'rûf bir kimesne zikr olunan emâkin-i müteberrikede vâkîf-ı mûmâileyhin hayrât-ı mebrûresinde cihât erbâbı olanların hizmetlerinde ihmallerini her sene surre îsal eden kimesne ile evkâf-ı mezbûre nâzırı Darü's-Sa'âde Ağasına mektûbîyle i'lâm edüb mukâbelede her sene yirmi flori irsâl oluna ve dahi şöyle şart ve ta'yîn eylediler ki sadr-ı Kitâbda zikr olunan Kesendire adasından hâsıl olan mahsûlün bilâ- ziyâde ve lâ-noksan rubhu Haremeyn-i Şerîfeyn fukârasına sâl be sâl bilâ-tevakkuf ve tehîr irsâl olunub bâkîsi sâ'ir mahsûl ile ber-müceb-i şart-ı vâkîf salîfü'l-evsâf şerh ü beyân olunan mesarife sarf oluna ve dahi vâkîf-ı sa'âdet-kârîn şöyle şart ettiler ki tevliyet-i mezbûre utekâsının aslâhına ve ba'dehu evlâdlarının aslâhına ile'l- inkırâz nâzır-ı mûmâileyh marifetiyle tevcih oluna ve dahi kitâbet ve cibâyet hizmeti ve sâ'ir cihat utekâsından müstehak olanlara tevcih oluna ve dahi vâkîf-ı refiü'ş-şân el-mahfûf-ı bi-sunûf-i avâtü'l-Melikü'l-Rahman hazretlerinin mahrûse-i İstanbul mahallâtından İshak Paşa Mahallesi'nde vâki' olub hudûd ve müştemilâtı sadr-ı kitâbda mezkûr olan menzili bî-âdillerini ve Galata kazâsında Kuruçşme demekle meşhûr mevzi'de vâki' hadîka-i mersûmelerini evvelen kendü nefis-i nefiselerine vakf habs edüp şöyle şart eylediler ki mâdem ki hayâtta olalar keyfe ma yeşa mutasarrîf olub ba'dehu hemşireleri seyyidetü'l-muhadderât ikliiletü'l-muhassenât safiyetü'l-sıfat zâtî'l-ûla ve sa'âdet Fatma Hâtun dâmet ismetuha ve zâdet iffetuha hazretleri tasarruf eyleye ba'deha mezbûre Fatma Hâtun'un zevcleri olub cevâhir-i elkâb-ı zahîreleri ile bu sehâif-i şerîfenin evâil-i tersî' ve zevâhir-i evsâf-ı fâhireleri ile bu nemîka-i latîfenin fevâtihi terşîh olunan Ali Ağa hazretleri tasarruf edüp ba'dehu müşârunileyha hemşirelerinin evlâd-ı emcâdları ila yevmi'l-mî'âd batnen ba'de batnin ve karnen gıbbe karnin mutasarrîf olalar ba'dehu mûmâileyh Ali Ağa hazretlerinin edamallâhu Te'âlâ izzettehu evlâdı ve evlâd-ı evlâdı kezâlik mutasarrîf olalar ba'del inkırâz eliyazubillâhi Te'âlâ min kahri'l-Feyyâz menzili merkûm ve hadîka-i mersûm ecr-i misli ile müste'cirîne îcâr olunup hâsıl olan îcâresi zikr olunan esnâf-ı evkâfın mesârif-i sâlifü'l-evsâfına sarf oluna

ve dahi vâkıf-ı aliyyü's-şân ve cemilü'l-ihsân hazretleri lâ zâle nâzıman li-ferâid-i kalâidü'l-hayrâti'l-hisân şöyle şart ve beyân ettiler ki evsâf-ı cemileleri âlâ vechi'l-icmâl zıkr olunan hemşireleri müşârünileyha Fatma Hâtun dâmet ismetuha ve sanet an nevâibü'd-dehri zatiha hazretlerine evkaf-ı merkûmeden hâsıl olan mâl-ı helâlden yevmî üç yüz akçe vazîfe verile ba'deha mûmâileyh Ali Ağa hazretleri mâdem ki rûh-ı pür fütûhı bu mesken-i bî bekâda mekân ve bu mavtın-ı inâda âşiyân eyleye vazîfe-i merkûmeye mutasarrıf olalar ve dahi utekâ-ı vâkıftan muhtaç olan ricâlden on nefer kimesneye onar akçe vazîfe verile ve nisâdan olanların on neferine beşer akçe vazîfe verile ve zıkr olunan ataîk ve utekâdan biri vefât ettikde vakf-ı mezbûrdan mutasarrıf oldukları vazîfeleri utekâ ve atayıktan müstehak olanlara tevcih oluna ve müstehak yoğ ise müteveffâ olanların evlâdlarına verile el iyazu billâhi Te'âlâ ba'del inkırâz âhere tevcih olunmayup vakıf için zabt oluna ve hemşirelerinin evlâd-ı kirâm vâcibü'l-ihtirâmılarından zükûruna yevmî altmışar akçe ve inâsına yevmî kırkâr akçe verilip kezâlik evlâd ve evlâdına dahi batnen ba'de batnin vech-i meşrûh üzere i'tâ oluna eğer mahsûlü vakfa fütûr ve gallâtına kusûr gelip vech-i meşrûh üzere sarfa vefa etmez ise evlâd-ı kirâmın zükûruna otuzar ve inâsına yirmişer akçe verile evlâddan mahlûl olan vazîfe kimesneye tevcih olunmaya velhâsıl amme-i mesârif-i mestûreden mebâni-i hayrât-ı mezkûre ve müstegallât-ı mezbûrede lâzım olan meremmât ve ta'mîri takdim olunup bilâ- tesvîf ve tehîr binâ oluna ve dahi şart ettiler ki usûl-i evkâf ve şerâit-i muharreretü'l-evsâfta tebdîl ve tağyîr ve taklîl ve teksîr kabzâ-i kudretlerinde olub merreten ba'de uhra ve kerreten isra üla tasarruf-ı tedbîr ve ziyâde ve tağyîr ve keyfiyeti istiğlâl ve ziyâ-i kurbiyetü'l-ziyâ enfâine istibdâl ve sâ'ir ahvâl kâinen mâkân mimma izz ü dihân eyâdi-i Kerîme-i deryâ nevâllarına merbût ola ve ba'de tertib-i hazîhi'l-evkâf vâkıf-ı sâlifü'l-evsâf hazretleri kibelinden vekîl olan mezbûr Ömer Çavuş meclis-i şer'i şerîf-i mutahhar ve mahfel-i dîn-i münîf-i ezherde hâkim-i muvakki-i âlâ-yı kitâb "*yesserallâhu lehu hüsnel meâb*" huzûrunda ikrâr-ı sahîh-i şer'i ve i'tirâf-ı sarîh-i merî edüp beni vekîl eden vâkıf-ı alişân bu vesîka-i enîkada şerh ve beyân olunan esnâf-ı evkâf ve ecnâs-ı ahbas mâru'l-evsâfî şerâ'it-i muharrere ve zevâbit-i mukarrere üzerine vakf ve habs ve tesbîl ettikten sonra emr-i tescîl ve tescîl emrinde mühim olan her dakîk ve celîl için mütevellî nasb ettikleri Sinan Bey ibni Abdulmennan'a bî-esriha teslîm edüp ol dahi tesellüm edüp mütevellîler sâ'ir evkâfta tasarruf ettikleri gibi tasarruf eyledi deyu ikrâr ve i'tirâf eyleyüb mütevellî-i merkûm dahi bi'l-muvâcehe tasdîk ve teslîm ve kâbzını ikrâr ve tahkîk eyledikten sonra erkân-ı mebâni-i vâkıf-ı salifü'l-beyânı teşyîd ve te'kîd ve temhîd ve te'bîd için vekîl-i nebîl-i mûmâileyh "*esbağallâhu niame rızaihi aleyh*" cânib-i evkâftan semt-i şikâka teveccüh edip mürûr-ı eyyâm ve kürûr-ı a'vâm ile bünye-i vakfa fütûr ve gılâl ve rey'ânına kusur gelmek ihtimâli dâire-i akıldan dûr olmayup sultân-ı serir-i ictihâd

sirac-i vehhac kâffe-i ibâd muktedâ-yı küll ve rehnümâ-yı sübül-i hümâm-ı akdem imâm-ı azam Ebu Hanife Numan bin Sâbit el Kufî “*âmelehullâhu Te’âlâ bi lutfihil celi ve'l hafî*” hazretleri katında bâb-ı rücû’a sed ve meslek-i istirdâda redd yoktur binâen âlâ zalik vakf-ı merkûmdan rücû’ edüp müvekkil-i sa’âdet kârin ve kerem-i hisâl hazretlerinin silk-i mülküne idhâl ettim deyu mütevellînin vakf-ı mezbûrdan ref’i yed etmesin talep ve da’vâ edüp bi’l-vekâle bu fehvâdan sühân saz ve nükte-i pervâz olıcak mütevellî-i merkûm “*şekerallâhu el hayyul kayyumu mesâihî*” cevâb-ı sevâb ve hitâb-ı müstetâba müteveccih olunup dedi ki evkâf-ı sâlifü'l-beyândan câmi’i şerîf-i refiü'l-bünyân bi tarâ’ikihi ifrâz [ü] mümtâz kılınıp vâkıf-ı müşârünileyh izni ile ve ezân ve ikâmet ile içinde cemâ’at namâz kılınıp ile (öyle) olsa hod kâffe-i eimme-i kibâr ekremehumullâhu Te’âlâ fi-dâri’l-karâr katlarında vakıf lâzım olduğunda şüphe ve inkâr yoktur ve sâ’ir akâr ve menkûlât kısmı imâmeyn-i hümâmeyn ve bedreyn-i kâmileyn-i temameyn katlarında bade’t-teslîm ile’l-mütevellî vakıf lâzım olur deyu feshine mâni ve nakzına muârız ve müdâfi olub hâkim-i hâsim-i mûmâileyh esbeğallâhu Te’âlâ niame rızaihi aleyh hazretlerinden imâmeyn-i mezfûreyn ve hümâmeyn-i mezkûreyn rey-i sedîd ve mezheb-i reşîdleri üzere tahattum ve lüzûmuna hükm ü muhkem-i şer’i ve kazâ-yı mübrem-i merîye tâlib ve râğıb oldukta tevki-i refi-i ziver-i sadr-ı kitâb pür sedâd olan sadr-ı celilü’l-kadri âl-i nejad hâmi-i beyzâ-i İslâm mâhi-i âsâr-ı zülûm ve âsam nâdire ve her hülâsa-i asr-ı afzalü’l-meşâhir ekmelü’l-nehâir lâ-zâlet ukâdü’l-mesâilü’ş-şer’iye mahlûleten bi-esnân-ı aklâmihi ve muhadderâti’l-kadaya el merîye mantûkaten bi-kalâidi ahkâmihi hazretleri dahi makta-i kelâm cânibinde teemmül ve tefekkür ve edille-i celiye-i mezhebinde tedebbür edüp temhîd-i mebânî-i hayrât ve hisân ve teşyîd-i erkân-ı birr ü ihsânı enseb ve evlâ ve elyâk ve ahrâ görmeyin vakf-ı merkûmun usûl ve fûrû’ muharrere ve kuyûd ve şurût-u müfsidesinin sıhhat lüzûmuna a’la rey-i men yerahu minel eimmetil uli’l-intibâh hükm-i muhkem-i şer’i ve kazâ-yı mübrem-i merî ile hüküm kaza edüp cemi’i evkâf-ı mezbûretü’l- evsâf bilâ-nizâ ve lâ-hilâf vakıf sahîh ve lâzım oldu min bad nakz ve nakzına mecâl muhâl ve ihlâl ve iptâlî mümteniü’l-ihtimâldir “*Femen beddelehu ba’dema semiâhu fe innemâ ismihu allellezine yübeddünehu innallahe semi’un âlim ve men gayyerehu ba’dema alimehu fe aleyhi lanetullâhi ve’l-melâiketi ve’n-nâsı ecmâin*” ve ecri’l-vâkıf el muhsin el mükrim ale’l Melîki’l Kerîm “*innehu yüczil muhsinîn ve la yudiu ecrel âmilin*” cera zâlîke ve hurrîre fi-evâhir-i Cemâziyelula min şuhûr sene erba’a ve elf mine’l-hicretin nebeviyye

Şuhûdü’l-hâl:

Kıdvetü'l-havâss ve'l-mukarrebîn umdetü ashâbü'l-izzu ve't-temkîn Mustafa Ağa ser hazînedârân-ı hassa fahrü'l-mu'temedîn ve zuhrü'l-mukarrebîn Süleyman Ağa ibn Abdulmuin ser kilerciyân Zubdetü enisü'd-devleti'l-aliyye ve sa'âdetis-Sermediye Mehmed Ağa ibni Abdulmennan Ağa-yı sarây-ı es-sultânî Fahrü'l-âyân zuhrü'l-akrân Sefer Ağa ibni Abdulmennan reis-i bevvâbân Sâhibü'l-kâdirü'l refi' ve'l câhi'l-menî' el mahfûfu bi-sunûfi avâtüfû'l-Melîku'l Mennan Ali Ağa ibni Abdurrahman reis-i bevvâbân Zürreyi'r-rezîn Ahmed Ağa ibni Abdulmuin kethüdâ-yı bevvâbân Kıdvetü'l-emâsil ve'l-âyân umdetü'l-ekâbîr ve'l-akrân Süleyman Ağa ibni Abdulmennan reisü'l-kâidîn Fahrü'l- mukarrebîn Mahmud Ağa ibn Abdulmubin kethüdâ-yı sarây-ı sultânî Kıdvetü'l -mu'temedin Ömer Ağa ibni Abdulmübin an-ağa-yı Bâbu's-Sa'âdeti lâ zâle makrûnen bi'l-izzeti ve's-saade Zührü'l-havâss Gürcü Mehmed Ağa Fahrü'l-âyân Yusuf Ağa ibni Abdulmennan Zübdetü'l- mu'temedîn Ahmed Ağa ibni Abdulmübin Fahrü'l-akrân Osman Ağa ibni Abdurrahman Umdetü'l-mu'temedîn Mehmed Ağa ibn Abdulmuin Enisü'd-devleti'l-aliyye Mustafa Ağa ibni Abdullah